

焦太史編輯國朝獻徵錄

焦太史編輯國朝獻徵錄卷之六十一目錄

都察院八

巡撫

韓文

王沂

徐源

韓鎬

林普長

張廉

洪漢

王珣

艾璞

周季麟

歐信

曹鳳

杜忠

徐節

冒政

曲銳

朱欽

安惟學

黃寶

陳鎬

李進

姜洪

賈錠

張淳

陳璧

高琬

陳璘

范鏞

沈林

伍符

孫熾

毛珵

唐澤

陳九疇

江湖

凌相

錢宏

陳祥

宋見

戴書

陳克宅

宋滄

胡纘宗

胡宗明

張文魁

胡岳

金陵黃應登

全校

吳興茅元儀

錢塘徐象標

梓行

目錄

焦太史編輯國朝獻徵錄卷之六十一

都察院八

巡撫

都察院右副都御史韓文傳

實錄

都察院右副都御史韓文字貫道直隸新城縣人天
順元年進士授行人司行人成化五年使琉球國歸
以所饋儀物獻之朝歷陞戶部員外郎郎中陝西右
叅議右叅政左右布政使至都察院右副都御史巡
撫寧夏尤畱心邊事有司方奉令捕豹上疏請止之
已而乞休致命給驛歸弘治十一年七月卒賜祭葬

如例文器宇宏濶以平易爲政未嘗肆苛猛立聲譽
但晚年以私憾發御史李興不法事幾陷興于死地
君子不能無議焉

都察院右副都御史王沂傳

實錄

王沂字希曾直隸武進縣人南京吏部尚書俱之子
成化十一年進士授禮部主事歷陞員外郎郎中山
東右叅政湖廣右布政丁父憂服闋轉山東左布政
使弘治十四年陞右副都御史巡撫真定等府兼提
督紫荆三關累疏乞休不允以十七年十一月卒于
官年六十二計聞賜葬祭給驛歸其喪沂嚴毅謹恪
天性孝友在禮部時有外國以獅子來貢希重賞又
有貢刀劔數至三萬者沂言夷人貪詐無厭量損其
賜直且定數著爲例 憲廟上賓凡山陵廟祀遷祔

之議儀文草創多所考據及巡撫時賦役繁重力爲裁省泮沱河溢壞民田廬奏請築堤捍之功成賜給幣獎勞自處儉約家雖富無貴侈態居官二十餘年始終一致人以爲有父風云

通議大夫都察院右副都御史徐公源墓志銘

王 葵

正德乙亥正月二十九日都察院右副都御史徐公
卒于家計聞 上命有司治葬事公諱源字仲山世

家吳長洲尹山之瓜涇祖孝質贈通議大夫都察院
右副都御史考諒初封工部都水主事贈武選郎中
加贈通議大夫都察院右副都御史公少好學工文
有名成化乙酉占南畿鄉薦乙未登進士第授工部
都水主事理徂徠等處泉源改兵部武庫司主事歷
職方員外郎武選郎中廣東布政司左叅政浙江右

布政湖廣左布政都察院右副都御史巡撫山東武
選最號劇司公至洗心自誓一意奉公權貴請囑戒
門者一切勿通而籍其姓名若將行罰者囑賄遂絕
時天下武功爵幾二十萬坐耗天下絕嗣者以疎遠
襲公奏宗派許襲傷支者一切罷之大革冗濫舊例
以罪亡者落職公謂罪有輕重以笞杖而革其職不
已甚乎人又樂其寬大司馬馬公甚委重之廣東勦
雲桂徭獍公督糧水陸竝進觸瘴癘深入師以克濟
山東歲饑公與刑部何侍郎分行賑濟劄臨清倉米
八萬有奇以補歲漕之數明年徵償公奏民賴拯給

稍蘇而又遽征之何殊弗給詔免與民涇王就封於
沂以水涸將由陸之國民爲騷動公檄所司姑緩之
亟發卒濬河水旋至坦然之國公私無擾公凡三蒞
場屋浙藩折卷多儒士御史意欲有所前却公曰科
場所取者文卽通榜儒士何傷山東斂銀將於鹿鳴
宴臨士公曰方筮仕而示以利非爲政之體乃已嘗
代祀岳鎮東海齋之夕應時澍雨闕里文廟成有白
金文綺之賜累疏乞致仕詔馳驛以歸公溫粹寬仁
人稱長者而臨事執守堅定雖當官蒞政未嘗一日
去書不觀文章博雅尤喜爲詩力去近世尖新之習

廣雅釋義卷之二十一

四

書有米家父子風

巡撫湖廣都察院右副都御史韓鎬傳 實錄

韓鎬字民瞻河南廬氏縣人成化十四年進士授給事中陞浙江右叅議屬浙大旱金衢爲甚有饑民奪富家食以自救姦盜乘之劫掠鄉村往來東陽義烏山中鎬聞之卽抵金華將赴義烏縣官謂不宜輕犯鎬曰吾計之熟矣彼倡爲饑民猶欲緩死若來犯我死無疑矣遂行夜遣人諭之曰汝饑民欲自救耳亦何罪吾來將賑之宜各散去否則剿殺之固不分饑民與盜也聞者相顧愕然比明悉遁去卽命各縣發粟賑濟且令鄉村嚴立保伍以相救護糾察由是數

郡肅然不復有警弘治八年陞本司左叅政寧紹溫
台四郡濱海歲輸粟數百石於沿海各倉而鄞縣糧
長相黨爲姦詐稱出洋遇風沉溺復議重徵積弊者
累年鎬至復有詐者鎬曰海神乏食耳何見奪之數
邪因廉得其實衆皆驚服十二年陞本司右布政使
海鹽濱海塘圯崩塌數千丈衆議塞之計費不貲以
民貧無所於辦鎬曰此事屬某當不煩官民而可成
蓋塘雖決舊石皆在又今年海鹽糧長當追餘價數
千兩行令每銀若干兩修塘一丈當衝之田亦令若
千頃修塘一丈糧長憚于出銀誠得修築則米

貨皆可僱役况舊石之外增添不多半歲可塞也乃以爲鑄不三月而塘成十四年陞湖廣左布政使中使往來者多以私鹽鬻于府縣索厚價鋪行率以破家鑄和買之民賴以不擾十五年遷右副都御史巡撫其地贊理軍務命下甫七日計聞遣官賜祭

通議大夫都察院右副都御史林公普長墓志

銘

王 鏊

正德戊辰三月九日巡撫雲南都察院右副都御史
林公卒于家 朝廷命有司治塋域仍命官論祭如
故事公諱普長字元甫後以字行而更字秉仁成化
甲午占福建鄉薦明年賜同進士出身時尹恭簡爲
冢宰識而異之曰雅粹端重宜居侍從之列奏授工
科給事中先是言官有以言得罪者中外以言爲諱
臺諫徒取克位公獨以獻替爲志乃言今進士科限
三甲恐不能盡天下才宜如宋制增置五甲其四甲

五甲皆授以學校之職庶人才不遺而師儒之職可重疏上忤旨時已詔公開封占城乃罷不遣而遣他使後他使有海禍或以罪戍逃人謂公有神明之助焉久之有旨召恭簡至內曰蕭顯等六人皆外叙公名預焉以母憂獨免服闋改南京禮科以憂去弘治中仍署本科未幾擢都給事中時儲貳尚虛公言宜早建以定國本土魯蕃以獅子來獻公言宜卻之以明明主不貴遠物時議且復用汪直王越公言二人授之尚未遠可復用耶餘若柳倖進慎選舉恤災患節財用薄恩宥優畿民皆累累爲上言之於丑提

山東布政司左叅政時齊魯旱甚所司方於歲額外
多斂以備賑濟公曰與其多取以濟民孰若寡取之
爲濟廣且均也會營德府妃葬大治瑩域公不可王
令承奉長史諭之又令諸藩臬諭之又面諭之終不
可乃易人董之擢雲南右布政使未浹月轉陝西左
布政使時方饑僅重以師旅公轉餉維時師以克濟
擢都察院右副都御史巡撫四川值寇作公嚴督將
領平之有襲衣白金之賜蜀歲轉餉松藩路出蕃中
蕃人劫掠邀利官吏又緣以侵牟蜀人病之公設方
略禁貪緝橫其弊幾絕而議者顧不便焉甲子改命

巡撫貴州旋又改雲南以積勞賜誥進通議大夫推
封三代且錄子有恒爲胄學生公時已病痿在告疏
三上始得旨給驛以歸逾二年卒春秋六十有四公
長身美髯眉目朗秀襟度冲粹不見畛域而執守堅
定不以利搖勢奪家居敦行孝友置九牧祭田緝譜
藤復孝義堂居官潔廉明慎所至人懷之凡汲引人
才人未嘗知察友嘗被誣以身家保之竟亦不使之
知也林世宗閩之莆田世稱九牧林氏

右副都御史張廉傳

實錄

右副都御史張廉字孟介浙之歸安人成化丙戌進士歷刑部主事員外郎郎中擢江西按察司副使時賊寇廣信永豐銀礦廉命塞之以絕其望遂潰散轉貴州按察使奏誅印江豪酋置縣官及遷左布政使與征都清苗寇有功請增貴州解額自廉始擢右副都御史巡撫貴州疏言屬府黎平僻遠而五開軍衛牽制兩省宜令湖廣兵備副使聽節制及削鎮遠土官置縣官如印江例皆從之廉剛方鯁直好面折人過動與物忤由是被論劾致仕行之日父老軍夷無

慮千數遮留之正德四年四月年七十六卒于家既
卒家無厚產鄉人以此重之

雲广洪都御史漢傳

李開先

洪公諱漢字天章別號雲广曾祖大隱行甚高祖士中父讓俱贈通議大夫都察院右副都御史母李氏妻司氏俱贈淑人幼入縣庠以講書見稱縣尹張慶政暇每早召至後庭講近午方出給之紙筆甚多巡按于鄉試後卽出巡至章意將爲其鄉人報復益其鄉人有先任縣尉者衆秀才曾在上司處發其奸而罷其官三日下午學撤籤講書方展書卽斥出跪于二門外如是者凡五六人公揣其意在背講因密告長教若舉善講者則以吾名應之已而舉及卽至書案

前照常禮畢稟講何書巡按厲色曰講中庸纔吐一
句卽怒曰誰教爾講首章熟易者衆連聲連其跪伏
公不少動巡按乃命講中庸卒章公先朗誦經文一
遍然後貼註詳解有節奏有理致承上起下處更有
照應巡按大喜謂此生曾入試場否應以入而闕學
偶乏科巡按笑曰有是人而不取作解首主司可誦
無目矣且對書講書何難如應試亦將携書耶讀書
垓時乃儒生分內事顧惡有司之不遂其請也厚詎
而力去之本欲有所懲戒有高士在中吾怒無所發
矣盡以有司所備紙筆花紅賞之成化戊子中鄉試

壬辰第進士丙申授工部都水司主事管理濟寧同
河值天旱水涸權豪往來任其啓閉公嚴立法禁衆
懼無敢肆行者庚子改司虞衡監稅荊州竹木徵取
平恕商民德之辛丑陞署員外郎巡五城街道點視
九門天壇之旁逼近御路秋水泛漲衝成一灘廣數
十丈深三丈中官惡之者將以此中之次日午後
駕出同事者急不能爲謀公卽速集搭綵匠用杉木
爲棚鋪板而覆以土扈從中官乘其彙而不得問之
人而知其事乃服其才後監修大慈恩寺工完同事
者欲援故事乞恩公曰以文職修寺不能諫止復因

之得官豈不貽笑乎衆乃止甲辰陞都水司郎中朝
議以漕政廢弛簡命風厲人員清查公同御史謝文
往焉條陳十事上之而糾治貪婪武職選補老幼運
軍及處置造船事宜興革一應利弊尤其赫然可稱
者也仍劾總漕等官弗稱任使者數人後皆更置別
用漕政一新弘治戊申廣西缺右叅政以公才望超
補之抵任卽爲兩廣總督軍務秦部御史委同陶廉
使歐叅將等查勘田州上官不法事并會征古田等
處猺獞兼督軍餉所至俱有成效壬子閔都御史仍
委公與陶歐輩再征古田猺獞各領兵馬分爲四哨

約同日發兵陶欲先期公聞之謂同哨歐叅將曰卽當整頓與俱歐欲守約公斥之曰汝不聽吾言若陶兵有失事機吾將劾汝矣遂併力進攻果獲首級最衆惟馬總兵馬叅議一哨失利被害麾下土兵奔逃公急追回撫諭之衆又告稱絕糧公曰我旣在此糧何足憂設法水陸並運軍兵萬餘無苦饑者荆竹嶺獐賊千餘標掠斷絕行旅公與劉僉事適經其處分守康叅將謂曰當由舟行陸路必與賊遇奈何公曰朝廷設官專謂地方今道路不通三月矣吾輩若再退避道路何時可通耶遂毅然而往賊勢果熾乃

遣驍勇數百騎爲前鋒繼以步兵夾擊之公亦親御
戎服鼓舞士氣以督其後賊衆登山望見人兵壯盛
遁去路不復梗矣永福地方有徭屬八百餘人占據
民田鎮守副將已發兵二千駐劄將兩月計無所出
公因校筭與劉選委洞曉夷情者先行齎文推誠招
撫仍耀兵揚威以懼之夷皆退散田乃復總督衙門
以其績奏聞蒙 上給賞綵段銀牌仍命捕捉前殺
總兵叅議賊首解京公詣其地幾半載設伏出奇生
擒六十人械送總督軍門發下按察司監候賊穴地
遁去司官俱以罪黜而公以丁憂回籍襄事如禮丙

展補江西叅政尋陞四川右布政使在四川善政宜
人撫按及兩京科道薦章連上古田猺夷復叛都臺
因奏公向在廣西日平賊有功未蒙陞賞乞卽特加
褒獎以勵後人賜大紅織金雲鶴綵段衣一襲戊午
陞陝西左布政使不旬日陞都察院右副都御史巡
撫大同叅贊軍務公至大同訓練軍馬修築墩臺措
備糧餉撫恤軍民糾治權奸搜剔蠹弊風紀振而邊
境肅然非舊日比矣上疏極言便益地方八事而增
守備以專責任演神機以期實用置方田以遏胡騎
寬住俸以借進官尤爲八事中之切要者蒙恩錫三

品詰命年逢荒旱公遂親製禱文歷數已罪遍詣應
祀神廟懇祈不數日大雨沾足白晝星隕朔方墮地
有聲援據史占知外夷內侵又重陽祭旗焚紙火墜
總兵首衆軍士競撲滅之是非吉徵乃痛加修省嚴
整武備未幾虜果大舉入寇乃設兵待之總兵居中
遊擊居左叅將居右極力抵却三千人無畱者其一
以三大砲擊之虜不敢前鎮守太監及總兵等倚恃
中貴及世胄不聽節制方略以致失律喪師公引咎
自歸連劾失事人等奉命取公回京聽用所奏下法
司勘問得實各抵重罪惟太監改調陝西鎮守公因

先在工部觸忤司禮又以邊事論及中官其同類忌
之滕驪叅作回籍閑住名色公論大爲不平都給事
中任良弼等御史張津等累騰薦剡稱公才猷素著
宜同尚書周經侍郎許進都御史雍泰起用以盡其
長不報正德庚午以疾卒年七十嘗考一勝而有兩
同名者必一盛一衰公是勝有兩洪漢而徽州字朔
宗者名位不甚顯不但壬辰如永樂乙未有兩葉恕
宣德庚戌有兩王復正統丙辰兩李春景泰戊辰兩
張瑄兩劉瑄兩楊瑄俱在辛未一科天順丁丑之王
道成化丙戌之徐霖己丑之鄭宏甲辰之王溥其在

弘治則癸丑曹瓊丙辰陳言壬戌魯鐸正德辛未王
璽辛巳王朝用而丁丑則三張淮嘉靖丙戌壬辰戊
戌辛丑四科同名者張守約高節章煥陳善鮮見官
爵歷年相同者然位無崇卑近久惟不愧于心不負
其職爲可賢耳若洪公者豈非千百中一二人哉漫
及之見古今同姓名錄不虛耳

右副都御史王公珣傳

子崇仁崇文崇獻崇儉附

郡志

王珣字德潤曹縣人舉成化己丑進士授太康知縣調繁信陽擢南京四川道監察御史行部蘇松時例獲盜三百名陞四品俸而部中所獲至數千人珣按其非實多所平反曰吾不能殺人求進也歷湖州府知府陞河南叅政轉本司布政旋陞右副都御史巡撫寧夏以寧夏孤懸河北而境土狹小當先守後戢因濬賀蘭山渠以廣屯田遏虜騎邊防賴之虜冠花馬池深入臨鞏總兵郭鈞以衆寡不敵不敢出戰珣曰虜深入獲利而還實驕且疲以逸待之勝可必矣

戰於石溝破之進階通議大夫無何以疾致仕章再
上得馳驛還珦爲人孝友少時爲兄璉所撫及考滿
受陞官其兄子以報之里人稱焉卒賜葬祭如法祀
於學宮所著有奏稿十卷南野詩稿二卷

崇仁字仲安珦第二子也第正德戊辰進士授工部
主事時土木繁興貂璫競爲請托崇仁蒞之以正上
下肅然盜起兗豫奉詔討之仁綜理諸營器具先事
備辦兵士無譁遷刑部員外郎輟一獄事多涉權貴
皆據法治之出爲江西僉事宸濠潛蓄異志其妻黨
素橫悉裁以法濠欲中傷之乃餌以重幣崇仁辭不

受改陝西副使飭兵洮岷時虜酋亦卜剌出沒西海
因上區畫事宜當道不用遂引疾歸今祀學宮

崇文字叔武珣第三子也弘治癸丑進士授翰林庶
吉士改戶部主事歷負外郎中武宗卽位遣中官

織造因討長蘆鹽萬二千引鬻銀買料崇文與李夢
陽等言於尚書韓文執奏至再請但與六千引內監
憚之歷江西四川提學副使擢山西叅政壺關盜起
將發兵勦之崇文戒勿輕出諭以禍福多所解散因
擒其首惡餘黨悉平由河南右布政使陞右副都御
史巡撫保定引疾罷歸卒賜葬祭如法今祀學官所

著有兼山遺稿

崇獻字季微珣第四子也弘治丙辰進士選翰林院庶吉士後改禮部主事以逆瑾擅權引疾告歸瑾銜其避已削籍爲民瑾誅改兵部主事時山東江浙巨寇稱亂崇獻條陳六事悉見采用寇平賜白金文綺西北夷兀良哈入寇用總制叢公薦屬崇獻往乃先聲搗巢棄馬用步筭無遺策沙嶺之圍遂解尋陞郎中奉命徵南直浙江驛傳役銀盡革積弊歲餘得銀四十餘萬陞南京尚寶司卿以錢寧專政復引疾去嘉靖戊子用言者薦起爲南京通政司右叅議再晉

南京太僕寺卿癸巳拜左僉都御史巡撫寧夏偶感時事三疏乞休得歸家食三十年屢薦不起扁其堂曰三巳所著有孫子釋疑小學撮要禮記擇言雙清詩集韻語拾遺等書

崇儉字叔度珣第七子也舉嘉靖辛丑進士會考選庶吉士有達官見其詩翰者謂曰以君才學宜居上選惜年踰三十若稍減一二人選必矣崇儉正色曰天下豈有未事君而先欺君者乎達官愈重之觀政通政司未除官而卒所著有五桂堂稿春秋筆意等

書

右副都御史艾公璞傳

楊一清

艾公璞字德潤號東湖南昌人父敞號梅亭精于醫
是生公少學于郡人羅評事羅大奇之曰此子殊穎
悟他日必有聞于世恨吾不及見耳成化間登進士
第授工部都水兵部武選主事弘治間歷遷武選郎
中通政司右通政光祿寺卿都察院右副都御史巡
撫蘇松諸郡總理糧儲所至有聲如羅言初公方成
童爲從王父所愛求立爲再從父後梅亭翁不可乃
迫于從父命從之然非其情也則憐惜之至憤惋不
食後公貴於所爲後父母旣移封矣至當以通政加

封則備諸服色冠裳遣使馳上使還日忽不樂淑人
魏恠問之泣語其故且曰吾所爲父母已有子無用
吾爲後理況此事非吾父意與思及此肝腸寸裂且
今之人處此或朝仕而夕改吾竊病之吾今於再從
父母薄致祿養再移誥封亦尚盡心耳矣顧於吾父
母愬然未有報其何能爲情哉吾今竊有圖矣淑人
卽贊決之於是馳書所爲後父母遂上疏陳情事下
吏部覆奏許之公乃立四代主俯伏痛哭于考妣告
曰不孝兒歸奉祀矣已復別設一龕用祀從王父焉
及再從父沒心喪之如考妣公好義樂善尤篤于倫

型弟珊歿遺孤欽少時携至京師教育之俟有造俾
進諸學宮學焉再從父子壁蕩用官馬價至千金官
徵之無從得則桎梏諸囹圄公聞而泣曰吾不援弟
其死于獄乎遂罄囊貲爲輸官不足稱貸于人又不
足繼以田產璧始獲釋矣族人或不能昏葬每厚遺
濟之鄉宦某客死貧不能歸公賻之衣棺舟車親往
斂送之其素履如此比居官自都水主事至爲通政
日務舉職其在兵署選將籌邊多所裨益嘗奉建儲
詔使朝鮮賜一品服以行至其國秋毫無所取及爲
光祿悉得諸故所作無益事歎曰夫民財可如是耗

邪卽具疏欲一切革之疏且上條佐懼妨諸權貴止之公不聽已而得旨報允遂著爲令省費鉅萬
廟勵精求治屢下詔求言公首陳慎修德時布告國
國本舉良將重憲臣飭守令六事又陳聖政虜患田
賦散戎四事他如減齋醮節供用諸奏皆人所難言
洎南畿巡撫半載間徧歷所部郡縣問民疾苦察利
與弊而興革之崇明有捕寇恃海洋險阻越人取貨
攻城剽邑大爲民患屢招之不服公知其不可化也
乃陳卒集餉具戰艘爲勦捕計會勅至今督兵殲之
公乃指畫出師由海道夾攻浹旬而平捷聞上降

勅獎諭賜文綺白金百姓爲立生祠肖像祀之復勒
碑識焉有勲戚家與無錫民訟田官知爲民產濯獲
罪巨室莫敢公言者公承勘廉得其情悉歸之民遠
近稱快屬逆瑾竊政巨室以賂行田訟復作瑾勢方
熾使者覆勘惟風旨是承乃悉以田歸巨室顧劾公
前勘非於是瑾僞傳旨逮公詔獄訊之公不屈曰實
民田也瑾怒箠之幾死令遷家海南爲編氓家人與
公行數日方蘇哭公曰吾猶生活又何哭爲公居南
三年瑾誅奉詔還復官致仕杜門謝客暇則遊城東
別墅酌酒賦詩以爲日家廟未建曰事孰大於此乃

卜吉市材命工創建於居室之東遷主居焉時言官
交薦起之未及用而卒正德七年壬申歲也公生於
景泰庚午至是壽六十有三矣 論曰予聞諸鯁直

之士多剛愎難近而醇謹者或沉默取容跡公平生
所爲孝友和易可謂醇矣而其立朝每持正論臨事
不詭隨又何直也昔孔子思中行之士公其殆庶乎
遭際 孝廟聖明有所敷奏多見采行眷禮優厚不
可謂不遇矣晚值逆瑾中奇禍瀕死播遷及其復也
且柄用之而遽以計聞惜哉昔王祐按符彥卿事貶
官曰吾有德反人雖獲譴後當有顯者及子旦相果驗公事
與市同其後亦當與無異彼橫來者惡足爲公病耶

都察院右副都御史周季麟傳

實錄

都察院右副都御史周季麟字公瑞江西南昌府寧州人成化壬辰進士授兵部主事歷員外郎郎中陞浙江左叅政武康有羣盜躬往招諭平之興水利賑荒歉皆有善政陞河南右布政使尋陞左布政使周王怒其世子欲罪之季麟爲之調護王怒解父子慈孝如初陞右副都御史巡撫甘肅諭土魯番番酋歸所虜哈密忠順王陝巴乃奏還所留番使又增築要害以爲守禦計調巡撫陝西革前調省城防冬民兵四千止以千人番代又用內閣大臣薦調巡撫薊

州會勘御馬監收馬草場其所侵民業考諸附籍正
之不避貂璫之怒時有論其傳奉改鎮者益不知其
出於密薦也乙丑以病乞歸後逆瑾擅權以事洛職
又罰米千石瑾誅例復官未用正德十三年十二月
卒

巡撫大同地方右副都御史歐信傳 實錄

巡撫大同地方右副都御史歐信字孚先順天府薊州人成化甲辰進士授戶部主事奉命賑京西活饑民以萬計爲郎中督餉大同增置東大有倉乘賤易粟備用歲積至五十萬石歷浙江叅政河南右布政使山東左布政使俱有聲稱後陞右副都御史巡撫大同始至卽選將訓兵綜理屯牧修舉廢墜未逾年而卒時正德元年九月如例賜祭葬信修幹美儀邊幅整峻才足集事亦一時能吏也

嘉議大夫都察院右副都御史西野曹公鳳基

志銘

韓邦奇

正德己巳五月二十一日公卒初丙寅以來八黨擅權而瑾尤肆毒中外稱爲內相凡藩郡入爲京官必重賄方免禍見則長跪稽首內相不爲禮丁卯公自巡撫延綏都御史回院公弘治中所造士也不習諛禮又不知賄事適朝廷十日不御門或曰盍先謁內相公曰未見天子而先謁權宦邪不見瑾固舍怒後見瑾又長揖不拜瑾佯問入京幾日示見遲意公曰十日瑾又言都御史知回院故邪公曰聖恩

也瑾復問何以報稱公曰都御史風憲官振肅紀綱
激揚淑慝耳瑾怒目揖公出公歸卽上疏乞休不報
旬日再疏亦不報時瑾嚴勘天下錢穀以中士夫禍
勘使者希瑾意言延綏布糧汜濶過緣主者公適丁
外艱所司奏公當守制瑾乃罷公官聽勘竟誣公償
布五百粟千石立限繫家屬緩則將籍公家公亟鬻
世產完報然瑾怒未解也公隱憂發憤端坐不疾而
卒明年庚午瑾誅 朝廷遣官諭祭且給金營葬及
合葬事且不能如制而墓銘尚缺云公姓曹諱鳳字
鳴岐別號西野河南汝寧新蔡人高祖諱世隆曾祖

諱恭祖諱英考諱端以公御史時封如公官性度夷
大底信不苟妣劉亦以公貴封孺人天順丁丑十二
月初九日生公前一日孺人出於外歸見火光如車
輪當其前明日公乃生公生而靈異比就外傳略加
調說卽丁大義甫三載舉子業度越諸生尤以檢柙
身心爲務天台陳公選大儒也督學中州甚器重之
成化丁酉鄉試中式辛丑登進士除徽州府祁門知
縣或爲公難之曰祁土浮俗僞且健訟常思以處之
公曰若使我先逆民耶逆必設機械不得則重刑將
有悞罹法網者卒不以僞逆祁民凡訟至分下都長

虛心考其成隱奸巧詆莫遁其情然亦不深疾也祁
民愛之於是祁門治行爲最而當時徵之諸邑莫不
推先祁門者三原王端毅公爲冢宰雅知公弘治已
酉公考績謁部奏薦陝西道監察御史陝西王公卿
也當 孝廟熙洽之世公獨持風裁崇論正議多所
嘉納嘗奏事失儀鴻臚糾上 上特宥之謂左右曰
曹御史好官當略其細過辛亥御史奏蹟於是封公
及劉孺人皆獲封焉巡按江北潁州僉事某傲虐不
戢公將論之然僉事素善持人短長旦嘗忤公而潁
新蔡又甚邇或謂公曰此易與諂階宜寬之公曰身

爲風憲而避嫌不激濁必將挾私而傾善矣竟劾罷
之一路肅然御史七年陞蘇州府知府蘇州富饒甲
天下俗廼奢靡且崇祀非鬼親死則多火之公下車
首置義塚以畀貧者而禁火葬定婚喪禮不得過制
凡儀迎時序一切務從儉素違者刑之毀淫祠政平
訟理而當時各郡又莫不推先蘇州者弘治壬戌述
職入覲時宰臣奏宴天下賢有司於廷公與焉益異
數也尋陞山西左叅政湖廣右布政推都察院右副
都御史巡撫延綏地方 孝廟時虜久不入疆場無
警武備稍弛公蒞鎮則嚴部伍實倉廩謹操練明賞

訓推誠馭下將士咸悅各思効力終公之任虜至數
止邊外無內掠焉回院而遭瑾禍卒享年五十三歲
云公性清介孝友私居終身不御統綺不畜婢妾不
問貨殖父母兄弟無間言與人和易不爲矯激之行
處鄉黨恂恂無貴人氣所至遺愛在民祁門則豎碑
立祠蘇州則誌列名宦延綏則將士戴服至今猶有
過其宅墓而問且拜者至其不屈身於權瑾危行大
節一二於天下余總河道時公孫亨守堯以循良聞
上交下交無抗行無過禮余心異之及詳公狀乃知
公家法源流遠矣

都察院右副都御史杜公忠墓志銘 王鴻儒

昔大儒先生論位義之心人所固有而此心甚微必
用力於語默之際乃克塞而可大若宜語而默宜默
而語因詰之以致其情皆以爲穿窬之類可謂嚴矣
後世薄夫顧反迷此義陽開陰闇神迎色拒益以眉
目手足佐之鈎距揣摩端倪不露而誘掖如神俾人
出心腹腎腸傾輸無餘蘊然後操以爲奇貨而人或
有不得其死者吁其憐矣天賦人以仁義豈端使然
哉若故都御史杜公則不然公資稟坦夷內無城府
意氣軒豁加問學勤敏尅治融釋愈益完粹與人言

洞見底裏人有小善亦游揚不置或不及而請益則
懇款詳至無少畱藏事有難處公必爲之盡異同權
利害以求其善卽成敗不驗於後人亦感其忠蓋也
性剛毅疾惡如讐值頑率悖傲賊仁殘義麗刑書者
雖要且近不少貳如公者豈非所謂不失其本心者
邪公諱忠字世臣先爲盧氏人祖恭用薦授河陰訓
術遂占籍焉公自少修謹性不樂傲放補邑庠弟子
貢家居去縣十餘里晨往夕返手一卷於塗且行且
誦其勤如此成化戊子舉於鄉戊戌登進士明年除
濟南新城縣令越五年甲辰召爲浙江道監察御史

直以
數名
人之
言爲
論不
必多
其事
而見
其策

弘治辛亥出守平陽庚申遷山西布政司左叅政乙
丑遷四川右布政使正德丁卯轉左布政使仍臨山
西未幾卽拜都察院右副都御史巡撫延綏地方居
一歲卒年六十有八卒之前三月公嘗上章乞致仕
得請 命下而不能起矣實戊辰冬十一月十三日
也始公之令新城也分寧周公公瑞稱其質直忠信
議論操履皆有前輩風其爲御史也四明楊公維立
稱其剔蠹治姦踔厲風發其爲太守也括蒼俞公尚
賢稱其百廢俱興爲民所愛戴其爲都御史也太原
周公伯常稱其篤實老成無所往而不宜此四先生

之
此

者皆當世元臣舊德人所取信者其言如此則公爲
仁義之人可徵不誣矣公父諱楨累贈平陽府知府
母王氏累贈恭人娶張氏累封恭人先公二年卒子
男三人汝松汝栢俱生負汝楠醫學訓科女三人長
適衡秀先卒次適陳鎮次適張嘉儀孫男四人守經
守約守綱守紀女三人汝松等卜以四年十一月七
日葬於古榮陽成皋之間先塋之次託今光祿丞許
君本謙命銘於鴻儒鴻儒於公託交頗早而受知最
深是曷可以辭乎

都察院右副都御史徐節傳

實錄

右副都御史徐節字時中其先績溪人占籍貴州衛
成化壬辰進士授內鄉縣知縣有治行擢監察御史
遇事敢言不避權要嘗疏錦衣指揮牛循罪及顯詆
大學士萬安之失風裁凜然弘治改元遷直隸太平
府知府時郡中大疫節悉心治療全活甚衆進雲南
右叅政以平梁山竹箐米魯諸賊功陞二品秩壬戌
陞廣西右布政使征思南給餉有功甲子轉廣東左
布政使丙寅進右副都御史巡撫山西會逆瑾擅政
凡忤削秩罷歸瑾誅詔復職致仕正德十一年卒節

當
居官甚廉謹不忍擾民在太平朝二職於私解鄉人
過郡者以驢送出境驛遞皆不與知其中法類是

都察院右副都御史冒政傳

實錄

右副都御史冒政字有恒直隸泰州人成化乙未進士授南京戶部主事歷員外郎郎中弘治庚戌陞武昌知府守正奉公多所興革尋陞山東左叅政分守東兗弛南旺湖禁以食貧民又分守遼陽正德丙寅由遼陽陞江西右布政使將發以所餘餉銀千兩歸于代者毫髮無所取奉新饑盜且起政賑恤有方一時晏然丁卯陞右副都御史巡撫寧夏劉瑾以政前在遼陽軍儲有虧耗逮治罰米三千餘石累歲事方竟懷嘆以歸瑾敗復職致仕正德十四年二月卒賜

祭葬如例政爲人質直坦易居官廉正卒後家無餘
資其子稱貸襄事士論重之

都察院右副都御史曲銳傳

實錄

曲銳字朝儀山東萊陽縣人成化辛丑進士任大理寺評事寺副出爲福建四川按察司僉事松潘兵備副使改河南陞陝西按察使都察院右僉都御史巡撫寧夏進南京禮部侍郎改右副都御史仍舊巡撫銳既屢陞擢劉瑾怒其不謝已勒令卽舊任冠帶閒住瑾誅聽還鄉復其官階正德六年十二月卒銳有吏能所至獄無滯囚其在四川馬湖土官知府安贊恣橫行部者多避之銳誘執置之法疏請改流官州入德之故其以父憂服闋給事中劉瑾請令復任四

所以爲其才宜於蜀也其後不污於劉璋益亦有以
自守云

都察院右副都御史朱欽傳

實錄

都察院右副都御史朱欽字懋恭福建邵武人成化壬辰進士授寧波府推官擢監察御史風裁凜然陞山東副使以憂去服闋補浙江尋陞按察使湖廣左布政使進都察院右副都御史巡撫山東以民俗多酣酗下令禁釀適內使過境不得縱謗於劉瑾被逮入京有勸其賄免者不從然瑾竟不能害得致仕歸尋按舊事奪其職瑾敗仍復之欽端重有威儀居官清直所至以聲績著爲諸生時刻意考亭之學往遊徽士吳與弼之門以道稱于閩正德十五年四月年

七十七而卒

都察院右副都御史安惟學傳

實錄

安惟學字行之山西臨汾縣人成化二十年進士爲行人歷工部郎中平涼知府陝西叅政浙江右布政使陞右副都御史巡撫寧夏時劉瑾方遣官覈屯田邊儲惟學承望風旨所行過刻軍士多怨之者安化土翼鏐因而謀逆欲先殺鎮巡等官而後發兵何錦率其黨進公署惟學方與都指揮楊忠議事錦殺惟學于座上故恩典不及然惟學居官亦以清謹聞

撫都御史黃寶傳

廖道南

黃寶字廷用長沙人高祖興輔洪武初爲監察御史
寶登成化甲辰進士授吏部驗封司主事內贊訐謨
外開儀矩上稽時政下叅仕籍惟慎惟清罔或訾議
弘治中歷陞文選員外郎郎中懸水鑑以收俊乂操
冰蘖以勵風節一入柄以詔休嫩綜六計以甄循良
別善敗以察勤惰黜貪頑以謹愒愒遷爲太常少卿
修郊禋廟祫禋沈臨幸之禮禮克用正舉雅南絃頌
寄觀譯之然樂克用章十八年間協氣休徵惠爲聲
香者亦不能無少助也正德初擢通政晉應天府尹

陟都御史巡撫陝西時潼關以東民如縣屬花馬以南房多陸梁皋蘭以北城堡圯廢臨洮以西羽檄頻年實深思其患力以處之迺肅紀律清壁壘預餽餉防烽燧恤災沴屏黠狡猶恐北虜西戎互相援應則我軍難支彼類益橫建議斷其右臂扼其中吭以窮角之故河套虜酋莫我敢犯秦有寧宇逆瑾柄國罷歸瑾敗復起巡撫山東不踰月移疾歸卒年六十有八

都察院右副都御史陳公鎬傳

京學志

公名鎬字宗之系出會稽大父嵩以通天官學徵赴
南京占籍欽天監父嶽繇鄉舉爲豐城教諭公賦質
卓穎少受庭訓以文行聞成化丙午鄉試第一人丁
未成進士授禮部主事乞便養改南吏部郎中晉山
東提學副使爲人明敏有吏幹董學時校閱精覈公
廉詳愼終始如一諸生登降之序皆自書之不假手
吏人輯洙泗誌振發士習諸生感其風誼興起成就
者甚多齊魯間稱名督學必首推之晉江西叅政庚
午晉湖廣布政使會漢沔盜起流劫郡縣民之貧無

賴者蟻附其間徒黨日衆公設方略督兵以次討平
之餘賊未盡 朝廷卽晉公都察院副都御史巡撫
其地公歎曰良民可驅而爲賊顧不能還賊爲良民
乎於是移檄諸郡脅從者不治湖湘素服公威信見
檄卽盡散歸農蓋負固阻深者咸喁喁有更生之樂
矣壬申以疾乞歸命未下而卒所著有矩菴漫藁金
陵人物志行於世

都察院右副都御史李進傳

實錄

李進字時勉平陽曲沃縣人成化己丑進士授戶部主事遷員外郎郎中督餉宣府公于出納陞廣平府知府其地斥鹵恒苦旱進至特建石閘引河水灌田民利之改濟南陞四川右叅政江西右布政使河南左布政使陞右副都御史巡撫宣府時北虜寇邊諸將失利於魚臺嶺官兵多敗死言者因劾進進亦上章自劾遂引疾歸正德七年十二月卒

都察院右副都御史姜洪傳

實錄

姜洪字希範直隸廣德州人成化戊戌進士初授盧氏縣知縣擢貴州道監察御史陳時務八事彈劾不避權倖謫山西夏縣知縣擢廣西桂林府知府所屬古田縣久爲猺獞侵擾洪奏調兵討平之民賴以安屢擢雲南左叅政山西右布政使逆瑾方擅政許省有賀印錢山西獨無瑾中以法矯詔罷歸復罰令輸粟於邊瑾誅起爲山東左布政使時流賊猖獗調度兵食勞瘁成疾嘗上用兵事宜多見施行未幾陞都察院右副都御史提督鴈門等關兼巡撫山西未踰

年竟以羸疾卒于官時正德七年六月洪性亢直居
官清介身後家益落不能舉其喪久之始克葬云

都察院右副都御史賈公鉉墓志銘

公諱鉉字良金姓賈氏別號東林世居安陽之六韓鄉曾祖文直祖振俱隱德弗仕父贈文林郎監察御史琛母張氏實生公幼有奇質刻志苦學弱冠補齊庠弟子員成化丁酉領鄉薦戊戌春聯舉進士授知山西汶水縣汶水民健訟公至務以德化遠近帖服甫三載以賢能被剡薦召授湖廣道監察御史漚其行囊橐蕭然民故有包老之稱老稚遮道悲號不忍遽留其履以識愛慕居臺端未幾卽巡中路風裁果果盜賊近息丁外艱奔歸哀毀踰禮服闋接遯東有

都指揮李姓者久橫不法公首劾之武弁震懾而邊地肅然再按兩浙值溫處礦賊陳廣韻等搆亂勢焰甚烈公不避危險提兵勦平之捷報 上有彩幣之賚比回奏績最贈公父如其官母妻皆孺人弘治壬子擢福建按察僉事時建寧礦賊猶溫處撫臣以公請 上可之勅兵備其地一方以寧遂擢憲副歷山東憲長左右布政使憲度嚴明德意誕敷在在有聲而公之清操益至正德壬申晉今職巡撫陝西等處地方兼贊理軍務丁內艱聞計卽日歸時逆瑾恣橫羅織百司以公居方岳直慙不阿坐事罰米千斛輸

遂傾家償之畢事懼他禍遂乞休情極迫切再疏乃
俞之理敗銓部累起公公辭不赴今 皇上初元詔
晉公秩二品階資善大夫優遊林下方事行樂又明
年以正終于癸卯生正統戊辰享年七十有六公性
資沉靜器度宏雅嘗以矜莊自持自外觀之貌若遲
鈍及其臨事毅然有爲雖甚難處者無不曲中剔歷
中外餘三十年始終一節不少渝其居林下十有六
日處一室無他勝安暇則課子讀書惇行孝弟絕
不及時事物論高之

都察院右副都御史張淳傳

實錄

都察院右副都御史張淳字宗厚廬州合肥人成化丁未進士授瀏陽知縣擢監察御史會岷府奏逮知州劉遜科道論抹俱下獄淳方自外還抗疏請惜耳目以庇元首 孝宗意解尋釋之遷吉安知府俗故健訟蔓引動數百人經歲不決淳惟取當逮者訊之剖析如流獄詞輒手書片紙示吏吏無所措其姦版籍多巧僞淳廉得其實役均弊絕久之豪猾屏迹公庭肅靜若無事者郡收給引直號堂食錢前守率取之以爲常淳悉畀廬陵縣公用歲省民財數千兩自

奉甚薄食朝夕惟一鮑魚秩滿歸橐如磬正德丙寅
遷四川按察副使整飭松潘兵備轉南京太僕少卿
進應天府府尹務寬徵需以節民力癸酉擢右副都
御史撫治鄖陽時四川劇賊新敗疏請駐兵房竹等
處以防奔突賊平有璽書金幣之賜其冬改巡撫保
定等府兼提督紫荆等關淳行部防範少嚴或時寄
耳目於下爲所欺會言官劾其攜子索賂淳不自安
卽求養病歸正德十四年十月卒例賜祭葬淳修髯
火色剛果自信治郡最有遺愛雖古循吏或不能過
晚節功名頗損論者惜之

右副都御史張公淳傳

郡志

張淳字宗厚僉事敬之孫太學生鑑之子也成化丙午薦於鄉明年登進士初令瀏陽有逋賦歲積萬計乃糧長侵費公至喻以忠言皆感泣來輸三年政成名爲監察御史每覲入言多剴切不避權勢時有生言事下獄者公恥不與抗疏救之得釋頃之出按貴州有負固者乃招撫之擒渠魁普安阿保父子餘黨五十九塞悉爲編氓轉吉安知府吉民健訟公以一言折之訟卽平課農桑興學育才修里社敦尚節義民爲創賢侯祠尊陞四川按察司副使鎮松潘題額

番叛乃召集諸將授以方略皆相繼授首諸番僭服
進太僕少卿綜理馬政務在便民轉應天尹多惠政
士民賦京兆十思以歌之擢右副都御史撫治鄭陽
不逾月有巡撫保定之命是時傳報邊警公經略邊
務悉心區畫達虜聞風遁去河間諸郡告饑奉勅賑
濟全活者以萬計進階通議大夫上疏乞歸 上以
溫旨慰留疏三上始得馳驛回籍調治益殊恩也公
居身清約惟敝屋數椽田二頃園一區客至談說經
史或世故移日不倦有請託者禮遣之故人不敢于
以私卒年六十有六葬祭恤典恩禮

有加焉生二子
長卽相次子標

都察院右副都御史陳公璧傳

實錄

陳璧字瑞卿山西太原左衛軍籍直隸揚州府高郵州人舉成化壬辰進士授嘉興縣知縣性抗直不折節權貴人凡上司以事臨者與辨析民情利病侃侃不輒撓終能以氣服人後因薦擢江西道監察御史益勵風裁不爲委瑣齷齪中尤坦直披肺腑論天下事常持大體而臺紀克振久之進山東兵備副使扼臨清清河所經實要衝之地夫役百需疊弊甚一切裁省冗濫有貴璫信勢搖吻于民難饜璧折以法璫恚怒擊其首竟莫能辱其他均徭役剔奸宄被良善

清武備六者數事清源一帶德如父母事以民望所
屬進本司憲使時郡縣吏日惟繁訟取賦民率破產
輸納甚者度死于獄首下令禁之繩貪墨甚嚴其倚
法爲奸有所侵牟者黜弗貸故境內諸猾悉斂敢無
敢弄手十五年陞南京太僕寺卿董牧事馬政自兩
京竝設以來畱垌益安常襲故堂宇廟廡日就朽蠹
甚或傾圯不稱至則節縮帑餘重修飭之又建棲雲
環山二樓分毫不累於民而所履嚼然會邊鄙不寧
兩京歲取備用馬萬匹南直隸止三分多准折價以
便寄養璧從容處分州縣安輯無擾尤與人信不侵

爲然諾察屬有過率指摘之亦莫不委情輸素若投
醪然踰三載陞右副都御史整飭薊州等處邊倭兼
撫順永二府卽奉身勇退以養病歸家性孝友重行
誼待兄千戶某如父嘗以御史居家久微譴受朴無
難已官山東僉事某爲御史時有隙及卒傾貲敘之
故人皆高其義云

通議大夫都察院右副都御史高公琬墓志銘

嚴嵩

公諱琬字德資成化戊子占江西鄉試戊戌登進士
歷知松陽上海二縣名爲南京貴州道監察御史陞
松江知府陝西湖廣叅政右布政浙江左布政已而
拜右副都御史撫治鄖陽公器貌端重爲政矜嚴持
大體曉達民事謹慎點檢所至舉其職而上海松江
之政尤稱最上海松屬邑也地大賦繁公至減官糧
加耗奏以餘糧編銀催夫民稱省便官稅徵解歲有
羨餘數百金前政者例受之公則斥以建學舍齋廟

府宇館傳之敝圯者鋤抑豪強發擿姦伏屢辨疑獄
終其任無敢干以私聞父喪卽日奔歸民懷慕齋饒
迨至其家一峻拒之爲御史風裁凜峻出按蜀戎籍
持平不苛稽審有法衆號得體適松守缺松人咸願
得公爲守語聞吏部以公往蓋公前在上海威信孚
於民又熟其利病及爲郡邑適往蹕厲凡所興革弛
張舉措務建經久長利期無遺便乃已用文學飭吏
治考大成之樂聞詣學官飲射讀法率學官弟子親
爲講說課試高等者慰寵之飭陸宜公周文襄之祠
表忠節貞孝百廢具興松故饒財俗尚侈靡公身爲

儉約先之食不重肉客至豆觴魚脯一飯而已禁饗
燕俳優雜劇不一陳于前考公所爲庶幾君子德義
之風矣撫卹時劇寇剽七猖獗連河鄆襄蜀數州患
之都御史彭公澤專總制公受勅調漢土兵併力追
勦計畫勞勩渠黨就獲璽書獎勵有裝衣白金之賜
衆方多其功顧爲言者所抑得旨召公將別用之公
還過家卽臥不復仕矣有司議平賊功猶以白金彩
幣卽其家賜焉 今上登極推恩廷臣公雖家臥據
比以請詔賜誥進階通議大夫祖諱原亨考連江丞
諱仕忠皆贈通議大夫都察院右副都御史祖妣某

氏姓胡氏皆贈淑人益異數云家居十有五年年八十有五

通議大夫都察院右副都御史進階正奉大夫

陳公璘墓志銘

韓邦奇

陳公卒計聞 上命禮部遣官諭祭工部營葬事公
諱璘字邦瑞號一石山西太原之陽曲人也曾祖福
聚祖榮贈知州加贈右副都御史配趙氏贈宜人加
贈淑人父智兩淮都轉運鹽使司同知封右副都御
史母商氏初封宜人加封淑人公幼聰穎度越十九
歲克府學生弘治己酉中鄉試第二癸丑賜同進士
出身第一授太常博士乙卯相 孝廟享南郊見博
士氣宇周旋悅甚面咨何官益欲超遷不果錫之寶

鑑一時縉紳稱榮云戊午拜監察御史巡居庸諸關
關者崇岡峻壁天限華夷城守之固若金湯前後監
察蓋率付下吏閱圖貼竟事耳于是御史乃躬歷險
阨疏可城守者立將官增戍兵曰勞一時可爲千百
年之計者上曰御史言是蓋迄今邊腹永賴云未
幾巡按山東有近貴來山東取礦砂蓋近貴素多內
援又荷上命若御史無若我何御史曰民力竭矣
豈復堪益此邪疏論之礦役竟罷蔡河淤塞河流逆
決民田匪爲巨浸而稅尚在民民白之御史御史曰
是可導入漕河者蓋後蔡果入漕粒食乃登云先是

孫闕遭回祿修未完御史度工定期尋乃奏成上
遣官立御製碑文特嘉御史績第御史執法不阿多
忤尊貴人尊貴人盡憎嫉之遷浙江提刑僉事人多
心不平云僉事至浙摘發興除不異山東時既而又
遷陝西苑馬少卿少卿亦不以死馬爲閑散馬益蕃
息焉時少師楊公總制三邊疏薦少卿賢遷布政司
叅政督軍餉於是邊儲大足而民且稱便云遷河南
按察使其時豪猾交納宗室侵越法制及發覺又依
憑城社人皆患苦之按察使下令曰自今放匿人者
連坐捕獲悉正其罪境內肅然鎮守王太監殘暴特

甚民不堪命按察使面責之王亦知自戢云遷右庫
政轉左布政自此經濟大略益著乃遷都御史巡撫
湖廣改撫延綏益北虜寇邊警報特甚以都御史抱
籌邊才也于是繕城堡利器械足倉廩募戍兵選將
官邊威益震丙子虜賊寇邊斬獲甚多 武皇降勅
獎勵定靖清平邊牆功成有金幣之錫虜復寇邊復
大斬獲捷聞 上嘉都御史能賜蟒衣三襲益異數
云都御史三年天官舉常憲奏上錫詰推恩及祖且
蔭嗣入監旋推兵侍公以轉運翁及商淑人老累疏
乞歸 上曰璘素有才識又曰璘操守清慎已有旨

勉留看用心巡撫地方乃復起視事時總兵柳勇恭
將李永定把總許國士雲交納中貴人緣爲姦利軍
心恣之目爲四害都御史曰凶虐若此坐視之是都
御史縱虐耶劾罷之三軍稱快會大將軍彬導天

子北巡邊塞駐蹕延綏彬黨橫甚都御史執大體酌
時宜雖彬兇焰竟不害帥臣戴欽恃其權位又彬黨
也敢肆簡傲都御史怒甚蓋手自擊之有逆子旣成
獄彬欲活之亦不聽邊人相語爲真都御史云乃都
御史又引疾乞歸上亦不許報曰璘素有才譽有
疾善自調理以副委任亦不允蓋未幾而商淑人轉

選翁計先後至矣公自以前後乞休心本爲親乃常
能侍湯藥奉治命哀痛踰禮幾至滅性疏聞上命
工禮二部祭葬如例時彬又導天子南巡江漢延
議以上郡北邊重鎮天子外巡乃奪公至情畱候
代已而武皇上賓有不好公者疏論公謂都御史
宜罷詔從之公竟罷去未幾詔進公階正奉大夫云
公才既敏達而性復剛毅茂實敦本崇儉不能爲閃
倖媚悅之態爲諸生時放讀提刑司有攘金人爲亡
金者訟攘金人益以二百金賄公公嚴拒不納同事
生潛誘取之而亡金者坐誣後亡金者得直事發覺

同事生皆坐法公獨不污登甲時蓋有當道知公者
或謂通名可得吉士公不通名當彬竊柄時蓋諸司
皆以賂瞋彬公不賂瞋慷慨任事凡所爲蓋時所深
避而不肯爲者云生成化三年卒嘉靖十七年年七
十有二

都察院右副都御史恭惠范公鏞傳略 郡志

范鏞字昌衡人系出文正公後成化二十二年舉鄉
魁弘治六年成進士授中書舍人選湖廣道監察御
史鯁直敢言不避權倖因忤旨下錦衣衛獄旋得釋
補浙江按察司僉事歷四川按察司副使浙江布政
司右叅政浙江按察使所在釐奸起廢約已愛民而
民亦戴爲慈母畏爲神君尋陞南京操江右僉都御
史巡撫雲南右副都御史時中涓逆瑾用事兵部尚
書王瓊附之公秉直嫉邪動與瓊左瓊中之因降劄
廣布政司右叅議卒于官公生平大節不與時俗浮

況遇事直言權倖俾之然亦以是逮獄謫官復理重
被收中外交章表揚之詔復原官賜葬祭得蔭子謚
恭惠焉文正公在宋侃侃風節震耀千古幾百年後
而其孫鏞亦能世守青緇爲霜臺赤幟至甘心開邊
彈射權奸抑何壯也詔謚恭惠洵不負爲文正之裔
矣

嘉議大夫都察院右副都御史巡撫山東沈公

林基志銘

王 鏊

公諱林字材美沈氏世爲蘇之長洲人曾大父謚大
父洪考傑封奉直大夫晉州知州母張氏封宜人公
少好學成化甲午舉應天鄉試辛丑進士第時方重
內輕外或謂公有倖門可得內除公不從出知晉州
州人情而竄公教之樹藝蓄積修城垣興學校民間
利害以次罷行州之人皆欣然曰小沈吾父母也時
年未三十故云弘治己酉進南京刑部員外郎中出
知四川順慶府始至庭叅鎮守鎮守驕蹇不爲禮公

一拜而起鎮守怒曰一拜禮乎公曰若不以禮自處
安能以禮責人不顧而出巡行二州八邑之間覓觀
風土詢求民瘼俗喜告訐株聯芟引動至百人公一
見立決無所牽引人甚便之郡學湫隘文廟列堂之
右撤而遷之建御書樓增置黉舍齋廬庖庫祭器又
增樂舞生教以聲容舞蹈之節暇則親臨程試講解
惓惓無倦士子皆奮文獻遂爲諸郡甲郡故無城郭
乃鑿西山之石仍溝洫物土方度高卑厚薄俄遷雲
南叅政後守因成之及蜀寇藍廖倡亂所過殘破屢
至順慶不能入遠近來依保障民益思之至雲南交

人忽躍兵境上遠近恒懷公曰吾在此無恐吾請以身當之已而訖無事正德丁卯入賀 聖節時逆瑾盜政內外官守罔不叅謁公固不往瑾嫌之銓曹屢上公政不報最後擬山西布政命甫下瑾已遣邏卒謁公公行遇之途抗手而過至撫拾無所得獨以沿途乘傳白瑾有石文義者適在傍曰沈良吏也文義登未嘗識公而聞公名瑾爲免逮繫下巡按御史問狀家人愚禍不測規以賄免御史亦故緩其獄使得爲計公曰無庸墮官祿與隳名節孰重竟落職爲民罰米輸大同又輸沿途備直怡然以歸逆瑾伏誅言

者奏起公爲廣西布政使單車就道一如雲南之治
近世有所謂公堂錢者多出賦稅之羨名曰公堂盡
歸私篋雖號良有司亦然公一無所染凡修葺廨宇
立坊牌則取之又以其餘鎔範杯棬之屬爲公府宴
饗用時撫巡交章刻薦遂進都察院右副都御史巡
撫貴州兼理軍務時鎮筸銅仁烏羅等苗屢出劫掠
爲患前撫臣率以化外羈縻不究切之公曰是不一
柄刈且滋蔓蔓難圖也率勵將士爲深入計預給旗
牌招徠安輯諸寨皆歸附天生厓固恃險攻之蘭石
寨矢交下人莫敢嚮邇公調兵先截其餉道賊已困

火鎗飛礮繼之賊大窘奔竄俘其衆千餘牛羊器械
無算陳家孟溪九十七寨相率來歸給以流官悉隸
貴前二衛庶革土官貪殘積弊自是內境晏然初藍
廖二寇橫行蜀中數年朝廷大發兵剪之公患奔迸
降境爲患分兵守諸要害蜀寇盪平有犄角之助焉
癸酉間奉直公計乞歸守制朝廷遣官諭祭比服闋
詔起巡撫山東公在貴用兵勞勩成疾繼以哀毀在
途病加劇遂固乞致仕詔命馳驛以歸歸四年辛巳
卒春秋六十有九公生而端靜在衆中默然若不能
言而果然穆然之色人望而知其爲君子也第仕之

之初吳文定公亟稱爲處子之秀今少師楊公每言
昔在太學爲同舍生見公終日手一卷諸生誼開其
傍若罔聞也順慶之治有遺愛於蜀蜀人至今思之
不忘初順慶民相率立公生祠憲副楊錦至郡以書
來曰公何修而得此於蜀人盧御史師名行縣父老
請公祠在學官出入爲艱請遷便近許之他日復至
則已輪奐與然盧訝其戒之速知其得民之深也題
詩歎息而去及家居日焚香端坐不以事經心事二
親依依不忍去左右雖燕處未嘗敢南向坐初歸自
蜀弟麓已別居公亟過之出涕曰吾寡兄弟忍以異
耶待族屬鄉黨皆有恩義於乎其可謂篤行君子矣

嘉議大夫都察院右副都御史孚齋伍公符墓

志銘

張時徹

公諱符字朝信別號孚齋始祖醇福州長史目闕之
寧化徙于安福遂占籍焉五世祖洪以春秋登國朝
首科進士知上元縣死繼母難李忠文公爲作死孝
傳高祖綸生子冕舉于鄉知樂清縣贈河南道監察
御史冕子麟封刑部員外郎麟子希淵號拙菴則公
父也會試舉春秋第一累官右布政使祀于廣之名
宦祠母劉氏累贈夫人公生之前夕刑部公夢有違
官至其家心異之稍長教之春秋輒名馳藝林年十

九母夫人卒于廣州匍匐歸其喪成化癸卯鄉試
舉春秋第一丁未賜費文憲公榜進士選入翰林
秘閣書學士汪公傳公每月試亟稱爲奇才云會有
恙者竟授刑部主事而大司寇屠公寔器之命典司
章奏法比精詳諸司式焉轉貢外郎會嘉興寧波並
缺守司寇公欲爲嘉興得之乃冢宰屠公曰我方乘
銓而不能得一賢守乎竟以補寧波到郡卽以古循
吏自效兢兢禮法自公庭以至屬邑莫不整整時有
監生袁孟恪壻於顯貴以貲豪里閭殺人無忌又有
揚大王者怙勢橫暴吞噬細弱官司莫敢何問公皆

捕而法之豪右斂跡闔郡快焉篤意黌校諸生講
習資以膏薪每督學官至程品優劣無爽於公素所
獎拔如聞公淵量爲時名卿他如均徭役治水利減
楚宴戒戲劇禱雨而澍應饘災而疫息察富民之詐
領賑銀訊詰盜之夜竊耕犢益矯矯章卓矣會當考
察科道疏舉天下知府一十七人而公爲首嘗歲使
民不聊生令民得下海網捕爲活海道以令不自己
也而怒之嗾巡按劾逮郡士民七千餘人連名赴關
疏太守爲民得罪之故 孝皇憐而釋之反坐言者
亡丑九載考績擢浙江左叅政風動列郡小大吏慕

受令約惟謹已巳轉雲南右布政使到任甫三月而
逆瑾以宿憾傾之繫繫聞棘理敗乃免歸侍拙菴公
養志引恬懽如也辛未起湖廣右布政使會拙菴公
邁疾卒哀毀骨立服闋未起銓部輒補四川右布政
使蜀值兵戈之後百計撫綏會松潘寇警督餉苦勞
捷聞賜白金綵幣以旌乙亥陞福建左布政使丙子
入覲銓部考天下方面官獨與張公時峻最焉戊寅
陞南京光祿寺卿濱行豪軍假以缺糧倡亂時代事
者半月矣會鎮守市舶兩內臣與休罷副使高文達
皆不禮於公黨而肆螫適錢寧竊柄逮捕詔獄既而

得白閩人謂有天云先是內閣礪菴毛公私於家宰
陸公謂光祿之擢不滿人望奏改山東巡撫未及赴
而有亂軍之事已乃補直隸巡撫甫持節適 武皇
南巡細鉅畢辦 上嘉悅舉御觴觴之武將劉輝官
有張忠竝以寵倖前驩竊弄威福正色與抗卒莫之
逞裁輔要衝王師絡繹民心凜凜多方鎮定而六郡
三關晏然安堵 駕旋僅拜銀牌之賜不阿左右故
也連疏乞休俱溫旨慰留 今上御極懇乞骸骨凡
五取始得七年六十三卒

都御史孫忠烈公燧傳

王維禎

孫忠烈公者餘姚人也名燧字德成爲人沉毅有大略而與邑人王公守仁錢塘人胡公世寧同舉于鄉正德丙子公以都御史巡撫江西會寧庶人宸濠反孫公仗節死人至今壯之云宸濠者驚害多知人也好生事不靖術人有李生者揣濠知其指乃爲妄妖言諂諛濠喜厚賞術人因以其言起陽春書院以雷王氣濠由此乃爲反謀府中宦者劉吉南昌人李士實王春皆阿濠蓋計曰大王卽欲有所爲可先請復故護衛之奪者以嘗上指幸許卽有與其他以

濟國之是時正德甲戌也

天子嬖都督錢寧集官

戚賢兩人擅權用事濠遣人賂兩人兩人爲矯詔復

護衛如故濠見計遂爲反謀滋甚而士實等因言安

撫人劉養正有才略知兵濠乃招養正而養正益爲

妄言諛濠濠大喜日夜集吉士實春養正等四人與

計謀乃招納四方有罪亡脫及勇力才藝之子各數

千人爲衣食居處諸司頗皆覺知然憚不敢發也是

時孫公方爲河南布政使而胡公世寧爲江西副使

云胡公乃陰上書告其事濠聞卽復遣人賂兩嬖人

因遂陷胡公謫戍遼東濠懼觸衆憤不便乃復開館

廷士爲講聖人之學明已能好善禮士若此也關中
人故江西提學副使李夢陽者以詞賦高一代罷而
寓居大梁漆使人請陽春書院詩其飾詐要名如此
有頃孫公自河南遷江西覩漆姦愛之乃進諸司計
曰卽漆發奈何當是時適副使許公達管南昌部中
乃孫公卽又喜而令許公陰圖之而自下檄部中無
城者築無糧者亟蓄無兵衛者可選練丁壯居僻
治遠者爲寨立縣治以便約束于是進賢有城安義
有縣各有兵兵皆有餉悉如令漆念孫公每一令
出咸爲已備又愆胡公世寧往事意孫公必有奏乃

置入要路密詰之由是孫公凡七奏皆不得達奏略曰夫濠列爲藩王親爲宗室至富貴矣乃今所爲臣甚惑之府中使齎重寶往來京師者趾相錯于路此何以故也鄱陽賊凌十一閔念四吳十三者吏捕之急濠匿賊于西山祖塋中吏不能得夫匿賊安用乎鎮守太監畢真由江西徙浙江濠厚贍爲別別時辟左右密囑畢真首肯之夫密囑背公厚贍結好非藩王所宜有也其他顯罪甚多不具論論今踪跡可疑慮者其後孫公見奏格益懼度濠旦夕且舉事乃令兵局徙兵器于他所益復下檄諸郡設兵備焉在德

已卯言官言濠不軌

上遣重臣往欲奪護衛按其

事濠恐乃召吉等四人謀曰今使者來卽訊我乃翁
事敗矣不如遂反四人曰然因共定計追壽濠之次
日鎮巡諸司咸入府謝宴濠乃伏賊兵于殿內諸司
拜未畢濠奮膺高足立露臺大呼曰方今天子巡
幸在外 太后召我監國汝等云何孫公抗聲對曰
既有詔請出詔令衆觀之濠見孫公不可奪素亦憚
許公乃以問許公許公曰安得此悖妄之言乎吾有
赤心豈從汝反濠怒叱賊兵縛孫公許公孫公奮臂
推縛者指濠罵曰汝賊且不見天平天無二日吾有

二主哉吾死一身耳且見若種之漸滅也濠怒甚縛
者持銅錘擊折公臂曳公及許公至惠民門外害之
其時同謝者或從或默濠立即僞授劉吉太監令提
督軍務李士實國師王春劉養正俱僞授軍師焉令
人詣兵局取兵器無有乃括民間農器炊釜造兵器
歷二十日始就濠乃從妃婁氏官人百餘人登舟趨
南京又畱兵守南昌遣所親婁伯之橫峰招兵道出
進賢城進賢知縣劉公源清殺婁伯而濠兵先鋒攻
安慶者又不能下濠甚憂焉其時撫贛州都御史
王公守仁以行部道聞變乃卽駐節吉安移文遠近

令各以兵赴義于是諸郡練卒一呼響應居一月兵
集數萬所過供餉未嘗乏絕則皆孫公前爲之所也
于是吉安太守伍公文定製孫公及許公木主于文
山祠率所集兵以文哭之諸軍皆感泣因遂督兵至
南昌擊破之兵入濠宮畱宮中者多自縊死濠駐兵
王家渡聞南昌破悵然曰大事去矣我安適歸矣乎
是泣下官兵遇濠于樵舍風逆官兵戰不利俄而風
順王公令實茅于舟順風舉火濠兵焚溺死者無算
妃婁氏赴水死濠易舟挾官女四人而遁官兵追及
濠投水水淺濠不死遂併官人執之劉吉李士實王

春劉養正皆就縛而凌十一閔念四吳十三等脫而
至安義安義人縛三賊獻俘事聞 天子念濠懿親
不欲加誅令自裁諸與濠通謀者以輕重伏誅李提
學荅濠詩有規詞免罪其入濠府中謝宴默而不能
抗義者皆減死謫配居無何而 毅皇帝棄羣臣不
及錄孫公 今天子卽位首褒孫公贈禮部尚書謚
忠烈詔江西立祠賜額曰旌忠公與許公並祀之廢
子堪錦衣衛千戶世襲公配楊氏封夫人公起江西
時不以夫人隨公死報至楊夫人哭之哀其時昧旦
天剴然忽斷炯炯若目見者譁曰天開眼矣以濠就

棺日考之則此先未擒一日事也子堪徒跣赴難至
而家已擒伏公棺哭之乃更治棺殮啓棺公面顏若
生異香蒸蒸自棺中起江西人大詫焉以爲鬼神不
欲死之也初孫公至江西治解舍得古鏡于深溝中
背刻二十有八字其文曰光運扶日月心感天揚明
忠獨難塞天不世內靖斯以昭明字畫奇恠觀者多
不識後孫公死好古者以意辨之其文乃著焉孫公
自始仕歷七官皆有大功德具在國史中孫公三子
長堪今官都督僉事仲子堉尚寶司卿李子陞吏部
左侍郎三子者皆天下士也豈天予以報孫氏哉胡

公世寧濠滅後復官卒至兵部尚書王公守仁封新建伯 論曰夫孔子不語神非無神也有之而弗語之也世傳弘治壬子浙之文場中夜既半場中人見東西立巨人二一人衣緋一人衣綠合言曰三人好作事已忽不見是年孫公胡公王公遂同舉卒之年濠之變胡公發其姦孫公折其氣王公平其難三人相次成功二巨人告之矣豈非神哉夫奇瑰非常之士不可恒有有之皆天帝意也彼修一職立一節者豈不謂賢以扶世翊運能哉

孫忠烈紀遺

林大春

忠烈死忠夫今且七十年所矣其曾孫刑部主事以
建言謫居潮陽時過林子稱引先公遺事林子亦樂
道之而先是閩中人王祭酒維禎者嘗爲忠烈作傳
林子兄于京師後祭酒死其文遂不多見於世至是
主事以問林子林子曰夫亦各言其志而已矣主事
曰先生盍爲傳之林子曰蓋聞之雉尾雖華不以加
翟也狐腋雖美不以襲貂也祭酒既有言矣可復益
之迺主事請益力於是林子惕然爲作孫忠烈公紀
遺云公諱燧字德成忠烈其謚也其先爲孫武子之
後世官大梁至後唐時有仕爲三司使諱岳者徙居

餘姚子孫因家焉故今爲餘姚人公大父某父某皆以公貴贈禮部尚書母夫人李氏以成化某年月日生公公生有異氣自少卽負奇挺挺不撓弘治壬子與同邑王文成守仁仁和胡端敏世寧同舉于鄉入試之夜有二神人現遙相謂曰三人好作事聞者異之然莫喻其意也 武廟末年諸貴用事 皇儲未

建 車駕巡幸不時寧王宸濠因蓄異志聚天下亡命圖爲不軌於是端敏首疏其姦公繼弭其變死其難而文成竟收其功始信神言爲有驗云初公舉進士拜刑部主事歷員外郎郎中踰十有三歲始出爲

朝廷叅政轉貴州憲使河南右布政使久之擢副都御史巡撫江右是時濠方睥睨神器往往賂諸權貴通朝中陰事又屬以所知布東南要地而所深忌者惟公乃 廟堂竟以推公非其好也時公在河南聞命卽單騎就道以一僮一僕往及至鎮濠輒謬爲恭敬求結驩於公公正色待之不少屈濠由是益嚴憚公戒左右勿犯諱亦漸寢公因日脩內治嚴守禦下所部積粟練兵增城置縣及檄沿江諸路修戰具以備不虞其意常在濠濠知公意在已也思百計去公不可得一日遺公棗梨二物公笑曰不可蓋公知濠

忘已欲令蚤離其地以逞其私不知公職守封疆義
無可去萬一變從中起惟有舉義討逆以死社稷而
已於是濠恨始深濠疑公必有密疏如端敏也時令
偵卒從間道遮疏使果得七奏以報濠恨益甚濠所
害亡命羣盜橫行大江中多所標掠公募壯士輒捕
得渠魁斬之於是濠恨愈不可解矣先是濠從中貴
請復護衛屯田事連內閣至是內閣聞濠且爲變心
殊悔之因諷臺臣劾奏濠不法狀請革護衛以剪爪
牙有詔遣中使及都尉重臣責問且革護衛使者未
發而濠之所私卽馳報至會濠生辰方宴鎮巡諸司

諸司不知也明日入謝濠遂宣言于衆矯 太后密

旨以監國爲名諸司相顧震駭莫知所出獨公與副
使許忠節連抗聲請旨同口罵賊公憤甚至脫鞵擲
濠當額濠怒縱兵擊公中肩忠節以身翼公竝被執
曳出惠民門外同日遇害其年己卯六月十有四日
也是時天氣炎蒸忽陰雲四合烈風驟起城中士民
爭走收二公屍觀于禪寺遠近聞者無不流涕濠於
是遂發兵反大掠官民船數千蔽江而下破南康下
九江進攻安慶不克婁妃諫不聽赴水死王文成聞
變傳檄諸郡徵兵擊東南反者於是公所素練精兵

不期響應者以萬計軍威大振遂擊破南昌焚燒濠
故官濠聞解安慶還遇官兵于王家渡我兵迎戰稍
却既而大破賊兵濠因退保樵舍盡出金寶犒賊賊
殊死戰我兵以小舟積薪順風縱火焚之賊衆奔潰
濠始就擒 天子親征至瓜步尋幸金陵其明年冬
十月班師駐蹕通州濠與逆黨俱伏誅又明年守臣
上二公死事功次會 武廟棄羣臣 世宗卽皇帝
位始追贈公爲禮部尚書賜今謚許贈副都御史尋
進公官 詔立祠並祀于南昌賜額曰旌忠各歷一
于世襲錦衣千戶益特典也始公平江西修治督府

掘得古鏡一有光扶日月之文宸濠之變公子堪等
赴難易櫬啓視顏色如生櫬中習習有香氣及歸葬
餘姚卜地于某山之原又得古琴一金簪二葢奕世
簪纓之兆而流風餘韻益深遠矣其後子堪孫鉅曾
孫如津皆以廕累官至都督同知都指揮僉事而仲
子鼎季子陞次孫鑑次孫鉞次孫鏊季孫鏞並由科
甲高第致位九卿岳牧 世宗朝鏞嘗上封事今其
子如法復敢諫有祖父風卽主事也主事亦起家進
士其世食忠貞之報如此林子曰余曩益過洪都道
彭蠡望龍光于斗牛之墟途逢故老猶有能談忠烈

公遺事者方公之經略江西也蓋四載也其所爲操
心慮患者甚深要之何嘗一日不爲宸濠地耶顧濠
時猶憚有公在其謀未著假使臺章未下護衛未削
濠不卽反明矣乃不幸所私報至變起倉卒公不及
知反爲謝宴被挾手擊宸濠因而罵賊以死以致舉
義討逆之志未施此亦有足悲者然而調兵四集安
慶死守至纔長江不得下文成因之以擒王斬將伊
誰力也嗟乎汲黯在而淮南寢謀張巡死而江淮保
障至如公者其殆兼之不然安化王寘鐸之反非不
戢殺鎮臣也卒之泯泯

無稱焉語云死有重於泰山
有輕於鴻毛者其此之謂歟

嘉議大夫都察院右副都御史毛公理行狀

文徵明

毛氏姬姓文王之子封於毛其後以國爲姓公世家
蔚之閭門諱理字貞甫別號礪菴曾大父顯卿大父
以義皆不仕父俱以公貴贈徵仕郎南京工科給事
中妣何氏贈孺人初徵仕公贅于俞生子玉繼王孺
人實生而文公弟璜公生岐疑不類羣兒被選爲縣
學生時未冠也成化丁酉領應天鄉薦丁未試禮部
中高等廷試賜進士出身弘治庚戌授南京工科給
事中時孝廟清明方事開納言事者更調長詣往

往本切事情 上心益厭思得忠實之言用之公有
所論奏皆經國遠圖及當時機要故所言多見聽納
匡璫薄琮矯誕懷諼在畱司橫其說并陷士類一時
臺諫多以罪去公撫其尤不法數事露章劾之竟下
獄論死尚書秦紘鎮廣南與安遠侯柳景交搆中官
佑景逮秦詔獄事且不測公抗疏申理因論景諸不
法有旨景閒住而秦得致仕或言紘不當去者公曰
事不可激激或禍出意外且秦他時名位當不止是
其後秦果復用如公言大學士丘濬博學自信以天
下爲已任而性剛懷能以辯博濟其說人莫能難公

上疏極論其偏私因言天下事非紙上陳言可舉而古今異宜遠近異勢亦非一己之見可盡如洛之才置之翰林則有餘在論思之地則不可言雖不用時論建之御史以言事成荒遠者毋老可念公言其情請移近地以廣聖朝教孝之道又言餘官以言謫外不得同言官牽復則是臺諫之外不容有言矣豈所以廣忠益哉上皆嘉納丙辰以病予告家居久之庚申起告北上尋爲戶科給事中會北邊有警餽餼不繼師徒推劄多所失亡公劾奏諸將校垣畱不職狀他所奏餒及徵駁論薦成切事機丁巳奉璽書清

諸嶺南道拜兵科給事中久之擢山東布政司左叅
議時觸冒瘴癘舊疾復作上疏乞解新任不允逾年
始赴時弘治癸亥也明年甲子歲當大比御史檄公
提調試場公展采錯事必慎必勤內之區畫外之防
閑勤合事宜時王公守仁以京朝官主試得公綜理
得人爲盛中官出鎮怙恩驕恣多所漁取而藩府供
億圍奪縱橫最爲民病公隨事處分不激不靡民得
不敵而法亦無不舉待屬官以禮而教之以正前是
屬吏事上誦曲稱謂如卒吏痛斥之非大過未嘗有
所譴呵至治豪猾懲胥徒則盡法無所貸小民疾苦

必慰諭惻惻惟恐傷之民亦愛之如父母云在藩三
年以疾乞歸家居十年言官數有論薦正德丙子起
爲南京鴻臚寺卿戊寅進南太僕寺卿太僕治滁州
前是有司視爲閒局不復稟畏事多緩弛公極意振
率核欺蔽微進負扶微興壞所釐正爲多會逆濠以
寧藩叛首下九江攻安慶南京戒嚴恭贊尚書倚公
集羣僚議所以攻守公言南京國家根本重地而安
慶實南京屏蔽無安慶卽無南京矣賊起倉卒以我
無備故直搗九江以窺江左當出其不意調集民兵
水陸並進可以得志若待其至則虛實形見人情恒

擾事不可知已喬公以爲然遂以便宜檄公督頓泗
和陽諸軍爲江表聲援公卽日出次泗上會罪人已
得中外解嚴而公亦退還領太僕尋進公南京都察
院右副都御史督視江防公以年及七十上疏辭不
允改撫治鄖陽公再理前疏遂得致仕時 今上新
立中外翕然望治羣賢彙進而公以三朝老成超然
遠引用不盡才輿情有遺望焉公沉敏精悍料事明
審發言處事必要其終自其少時已無所苟比老益
詳慎讀書不事博綜而貴明理隨所得見之於用文
章長於奏議爾雅明暢援據精審而紆徐警發得告

君之體尺牘善叙事理疊疊數百言藻發雋永能起
人意居官以愛物存心尤慎刑獄在南科時會諸大
臣錄囚有繫難者因索直毆主人女奴死扼其吭而
絕之若自縊者主人執之坐死公疑邂逅索直不有
深蓄何至殺人卽誤殺當遂逸去又暇從容爲計又
安肯坐待執耶訊之乃女奴以他事雉經惡繫難者
責怒習故用抵調耳濟寧王彪者殺入置屍里中
家貽其兄叢彰證顯殺之公問獄至濟曰以兄
證弟已非人情矧彰一八何可獨據豈彰故有憾於
顯耶核之果然罪坐彪死吳有俞棠者素陰賊無行

嘗負朱佑金忿其責償每思報之一日誘至家醉而殺之其家疑俞所爲迹之無所得他日長蕩漁人網得一篋有屍焉潰腐不可識其妻識其故衣執俞聞官反誣其妻嘗有所私與佑弟奉嘗有恨於佑者共殺佑且誘其幼婢證成其獄而佑死之夕奉實行販於外不知也公力言於上官卒白其冤而寘俞於理或議公居閒非所當與公曰茲事人皆知之莫能上達吾知之又能達之可坐視其冤耶蓋公雅性於人緩急必爲致力至於官府冤濫民間疾苦與凡是非失得有涉疑似者惟無所見見必昌言之公旣無私

而言復明暢聽者爲之意消一時監司郡守若邑大夫有事輒就而問焉公亦未嘗不爲之盡與人交任與而有情在僚友中尤能推誠投分不肯自利以損人東藩有督餼督芻二役皆衆佐番休任之督餼歲至京師事勞而費倍芻在遼左費省而逸歲甲子公有遼之役同官方矩以私便請以京餼易之明年復以讓同官胃政於時咸以爲難厥後逆瑾用事誅求切促方胃咸以虧課追徵破產不能償而公初無所與人以爲公克讓之報公曰是有命也當是時吾亦焉能逆知其事而爲之就避耶公治家有法教子孫

必以正下至僮奴僕從御之皆有制其所授任必堪
其事卒皆得其死力殖產治第若積遺出內咸責成
其下晚歲業益克拓田園邸店徧於邑中垣屋崇嚴
花竹秀野賓客過從讌飲狼籍雖極一時之盛而公
無與也雅善養生平生保身如金玉愛養神明調護
氣息至於暄寒起臥飲食藥餌節適惟時故晚歲精
神完固餘年八十鬚髮不變語言動止與少壯不殊
咸謂公優游黃耆爲當世遺老詎意一疾遂不起耶
嗚乎惜哉公生正統壬申七月卒嘉靖癸巳二月享
年八十有二徵明於公爲邑里晚進辱公忘年下交

從衛引重雅意動至有出於通家姻好之外者故因
其子錫朋所建推其大校叙次如右庶太史氏有所
採擇云

都察院左副都御史唐澤傳

實錄

都察院左副都御史唐澤直隸徽州府歙縣人弘治
己未進士授平鄉知縣累遷至左副都御史巡撫甘
肅澤沉毅知兵在鎮五年虜報斃午悉心經略以勞
瘁成疾卒于涼州詔嘉其以死勤事特贈戶部右侍
郎賜祭葬嘉靖二十七年其子復以謚請六月追賜
謚襄敏

副都御史陳九疇傳

郡志

陳九疇山東曹州人字禹學以詩中弘治辛酉鄉試
壬戌進士授刑部主事囚越獄勢莫敢撓公荷戈獨
先囚敗就擒名重京師恤錄南畿閹瑾以不賂銜之
謫廣東陽山令瑾誅詔還本部歷郎中平賽楊虎獄
變遂菴楊公曰文以潤武武以濟變當今一人而已
再仕四川會制府彭公澤平流寇藍鄆陞秦臬兵備
副使而黨本兵王公瓊者以啓邊釁劾彭公公亦落
職尋復職陞本司觀察使嘉靖改元以宿望擢副都
御史巡撫甘肅夷王長驅薄榆塞時公在甘州虜偵

知戒嚴直趨肅州公率驍騎晝夜五百里凡七日與虜鏖戰梟夷王擒都督捷奏降璽書賞勞甘肅等處皆有生祠忌公者愬公詔下公于理尋手敕延尉赦之以皇太子生覃恩得致仕家居親九族睦鄉里州南卑濕間澇則傷禾稼蕩廬舍公力請通渠今稱永莫嘉靖己亥歲饑疫公輸粟百斛賑之前後計散俵金六百民乃少甦及公卒報北虜犯雲中急夏官卿王公侍御宋公交章薦公至則已封樹矣

都察院右副都御史贈通議大夫兵部左侍郎

江公潮墓志銘

吳國倫

江公諱潮字天信門人稱之曰鐘石先生豫章貴谿
縣人其先閩之浦城人宋宣和間有祖公榮仕爲弋
陽令因家弋陽淳熙初徙貴谿之湖陵里其後有名
彥璋者公六世祖也舉元鄉貢生文斌文斌生永漢
永漢以文無言丞監利生三子而其季爲公之祖曰
憲憲由鄉舉爲應天府學官生永陽令左卽公父娶
汪氏生公于成化丙戌五月二十三日公自少岐嶷
不羣應天公心奇之間攜以過其鄉高先生所公特

立竊聽高先生語移時無倦容高先生固目公而語
其倩張曰大江氏者必此兒也因從史張以女字之
弱冠補弟子員丙午舉省試第一弘治己未登進士
選授壽州知州壽雖祖宗湯沐邑然瘠而近陵民
不勝繁役屬歲大侵道殣相枕藉公至愴然下令與
民蘇息尋奏記諸上官拯荒弭盜招流徙所全活不
下萬衆會浙江大比士遣使聘公爲主試官公曰以
吾拮据一郡猶日晏不遑安得曠其職爲人從博士
家取代庖之譏耶因報書謝不赴時論高之未幾有
少年喜事者議請城中都公立草數千言諷之其略

曰茲大役也無論所在空虛而饑饉之民未易卒動
卽高帝神聖其自定鼎以往爲萬世保障計會無
一郡一邑不金湯也而獨于肇基之地闕焉豈智竭
而力不足與此殆有深意非臣庶所得窺耳今欲以
尺寸之畫而補神聖之所不及難矣哉其議遂寢
乙丑擢南京刑部郎去之日百姓遮道泣因築生祠
祠公正德戊辰擢廣東按察僉事分持風紀海濱吏
民肅然憚之會所部連州山寇李亞保聚徒剽掠禍
將蔓延公親督將士深入其巢擊破之事聞朝廷勞
以白金文綺庚午擢副使奉璽書視嶺南諸學風屬

學官弟子先德後藝一時所識拔類多異才如霍宗伯韜蕭太史與成其最也壬申奔永陽公喪里居三年哀瘁骨立除服補山東如前官風采無異居嶺南時而得士若李太僕舜臣者數輩後皆以名實顯故時人稱公冰鑑云庚辰遷山東按察使議其持大體治獄多所平反而獨繩墨吏抑驕將毅然不少貸嘉靖壬午遷廣東布政使公以廣故多珍賄異物而吏其土者率緣筮豆損名乃躬礪清白以風庶官已乃稍出納謹益藏節約諸經費皆目攝而手籍之庾人守藏吏惟有抱贖股栗耳公一日見幣金數百錠歲

久封議沒滅不可稽詰之守藏吏曰茲積羨也公曰
民方困征求而幣留贏金以資不肖者之私橐何謂
因盡括入屬籍以報兩臺使充軍需是歲省民間軍
需數百萬石而又塞一弊源益可謂不媿四知矣乙
酉公以文武才被薦拜都察院右副都御史巡撫山
西兼督三關軍務公下車未數日即行邊閱城堡堅
瑕芻粟豐約與諸將士勇怯衆緩急而弛張之居二
年虜不敢近會有太原人李福達以妖書惑衆聚黨
至數千人改年爲亂震動三河公勒兵解之而獨福
達掠重資遁匿他所已聞公圖其形購捕益急遂詭

張寅名入京夜持萬金爲武定侯郭勛壽因匿勛家
勛詒書山西使者爲關說欲脫其急公捕得其書
抗疏陳福達罪狀併劾勛倚掖廷親怙勢藏逆敢爲
亂階罪當誅不誅勛無以信法疏三上不報勛因得
流言官聞謬爲張寅稱冤 上疑之時永嘉張公新
相恐諸大臣不附已又欲結勛自固遂阿旨下公詔
獄且使人陰嘗公少易而言中丞可復也公正色謝
曰人臣奉法無狀不知死所何以官爲永嘉知公不
能屈卒從來減議罷公官公旣罷歸日侍太夫人養
甚愉悅間從鄉長老賓客雅歌酣飲不復談往事久

之勛坐不法敗 上亦悔詔獄非實中外人人謂公
當復召用而公獨晏然將終其身無何真人邵元節
新被寵以禮部尚書乘傳詣龍虎山爲 先帝祝釐
所過無不望塵希恩者獨知公負重名先使人致幣
將招公公恐其污已也使人報其幣謝不與見已劉
給事君賢疏薦公有風節可當大任公聞之愀然歎
曰吾罪累也奈何巖穴不深而猶以姓名辱世人耶
自是益遠引不入城府辛卯春正月六日病卒享年
六十有六業已葬白谿之東原越數歲有司舉鄉賢
而以公與高先生爲稱首而並祀之高先生知人哉

隆慶改元奉 先帝遺詔錄公忠追贈公通議大夫
兵部左侍郎遣官爲起塚而諭祭之制辭有持法正
妖矢忠遭譴云云嗟乎公生平槩見奚啻榮于華袞
已哉吳子曰往予釋褐聞朝著長老談大獄狀令人
竊悸髮上指冠夫永嘉其時馮 天威以修其睚眦
至虜辱諸言官大臣何震讐也已乎公三疏讀之益
可謂諤諤批逆鱗而猶幸其得禍獨淺豈忠言正氣
有當于社稷之靈非權幸所得辱耶乃武定之奪侯
與永嘉之免相皆不旋踵公身後數十年重見褒卹
炳炳國史與三辰爭麗人臣何以負國爲哉

通議大夫都察院右副都御史凌公相墓志銘

崔 桐

副都御史凌公卒之明年禮曹遵京職三品例狀公
治迹以葬祭請 天子以公爲賢報曰可命有司治
葬事翰林院撰文賜祭一壇公子所羣以墓銘徵於
桐桐奉讀 論文其略曰供事累朝蒞官三紀賢勞
茂績資望方深又曰國用舊臣詎意淪逝計音來報
良切悼傷桐惕然嘆異曰 聖恩何優渥哉國報稱
以竟厥施公之志也而今已矣其如 聖眷何哉公
諱相字忠甫號芹溪生而體貌豐偉穎敏強記弱冠

領弘治乙卯鄉薦登己未進士辛酉授山東沂水知縣沂水民健訟徭役歲不均公至覆惡樹善定額限徵無何沂民畏威懷德逋負報足當道上其狀尋擢南京廣西道監察御史公守正不阿苞苴不入嘗論劾不職大臣數十人士論直之辛未遷廣東按察司僉事兵備惠潮諸郡會巨寇大峰嶂李四子等據十四巢爲患公躬親奮擊火其巢穴巨寇悉平捷奏天子賜以金幣陞俸一級丁丑以內艱服闋補山東僉事戊寅遷遼東行太僕少卿嘉靖癸未遷苑馬寺卿公居遼六年清理餘丁匿馬歲增萬計急畧分巡

決大獄不爲豪右所奪當道廉其才能檄以督修邊
城負城有山曰十方寺高數十丈廣可十里爲夷虜
駐馬所得伺城中虛實公指麾散夷圍之境內且諭
以吾故地與之立券示無相背監司奏公績賜銀牌
緣幣陞俸一級丁亥遷四川右布政使時有芒部之
役公督餉有方大軍倚之左右有以買木羨金五千
私公者公卽日移文具白撫巡蜀人咸清其操己丑
遷雲南左布政使夷情有積歲難處者公從容籌畫
轉無遺策爲當道所器重庚寅遷都察院右副都御
史遷撫湖廣兼督理軍務湖省故有鎮守內監及總

兵官諸冗員公悉奏革之民賴以蘇是歲甘露降嘉禾生黃岡民有一乳三子者表上詔賜鏹幣以異其致協修顯陵工成亦得例賜鏹幣居二年公以病懇疏乞骸骨得溫旨慰諭不允辭公素短視前任滇南日偶失禮於部使者風其同類追論公公亦疏辨且乞休壬辰得致仕先湖湘人元末有萬一翁者徙於通遂爲通人四世諱仲禮生守約守約生公祖瑄瑄生雲號石巖公父也瑄雲俱以公貴贈通議大夫右副都御史卒以庚子五月二十有五日生成化乙未二月二十有五日生年六十有六平生奏議已

都察院右副都御史錢公宏神道碑

童承叙

公錢氏諱宏字可容別號江樓世家錢塘少穎重不
羣弘治甲子以賢籍舉順天高第正德戊辰登進士
武銓部政已巳遭父喪辛未服闋除刑部湖廣司主
事乙亥遷廣東司員外執法明允尚書張公重其才
使閱章奏參決庶獄會慮囚多所平反有權貴恃勢
抗法公竟按如律因見忌丁丑轉山東按察司僉事
辛巳遷副使公在山東幾十年歷綜兵備清戎驛傳
屯田諸務勞績最著初毅皇帝南狩供需靡紀極

巡撫王公達公使處分隨事經緯貴近弗能屈上下
賴焉吏有以行賄敗者公按治之吏窘陰欲持公伺
之卒不能構章丘潦歲大侵公賑卹盡力全活幾萬
命民爲立祠祀之巨寇起齊魯間公督兵殲其渠魁
餘悉解散時巨璫鎮守役民夫無時公首裁之民間
公名輒曰錢使君青天也至今誦焉嘉靖丁亥進廣
西按察使持憲有體馭搖僮以恩信戊子入覲諸酋
長率衆送道左益曠事也已丑轉福建右布政使辛
卯進湖廣左布政使二轄事剴盡弊叢集公至爬剔
殆盡刁猾斂避壬辰擢都察院右副都御史奉璽書

提督南贛軍務公益威奮設方略勤撫御遠近效順
盜賊屏息公以其地上游不可一日弛備乃刻武藝
圖訓將士身自臨閱軍聲大振復爲文論民勤儉併
拾示賊所官巢處俾知所警祠清獻趙公信國文公
以勵忠節癸巳疾作遂懇乞歸至再上始得請凡三
越歲竟卒年六十有一平生嗜學好問所著有江樓
遺稿尤工漢隸日臨池不倦公之先本汴人扈宋徙
錢塘玉泉山祖兆之左有司所營葬也

都察院右副都御史陳公祥墓志銘

呂 枬

公諱祥字應和姓陳氏瑞州府高安縣人也公天授
俊拔穎悟過人既舉進上以縣令召爲監察御史所
至伸聖憲抑摧折豪強賊吏率望風解印綬去然直
言危論風振一時當路陰忌出爲惠州知府公至斷
獄如流民有告理齋糧教合計刻白事時有陳半升
之謠民有二女嫁爲比鄰者姊素不孕一日妹產子
而姊之妾適同時產女也乃棄其女而號于衆曰妾
產子也遂夜燒妹傍舍聞妹夫婦赴火所乃竊抱其

男歸爲已子姝覺往索之弗予因訟于府公無他證
不能辯佯言曰必殺此兒事卽了耳乃置甕注水堂
下引二婦出取兒密諭一卒謹視之而告其婦曰隱
情無證斷案可憑禍本不除爭端曷已吾爲汝溺此
兒以解汝紛乃佯怒叱卒詐爲投兒狀而復令左右
追逐二婦使出其姝失聲爭救不可得則顛號什堂
下而婦妾竟去不復顧公笑曰事白矣卽以兒付姝
而反婦妾杖之曰果汝子也安能聽人殺而不救乎
婦妾不敢言一郡以爲神時長樂強寇張林二渠魁
負固劫殺公外論百姓樂業因弛賊禁密台所害受

賊害者授之方略伺其歌飲一

擒之惠民用安

在任三年陞廣東按察副使廣人習聞其風無敢作
姦飾非者嶺海之間一時振肅三年陞河南參政分
守大梁吏民畏愛遂陞福建右布政使未半載遷左
布政使順天府尹右副都御史總督南京糧儲尋改
巡撫應天等府地方應天諸郡爲東南財賦之地吏
多冒沒公愷懲澄清剔去賊汙南畿晏然公素有疾
又以母夫人高年屢疏乞休尋以嫌隙被論待勘家
居二年朝廷急欲用公詔起之而論者益并力沮公
遂以副都御史致仕又年餘卒六十一歲卒之日所

居荷山北崖墜石數十聲震如雷公筮仕上虞卽
多善政有去思碑雖被公刑者亦憐好官云服闋僦
奉亭華亭壯邑令恒敗于利公永葵之操毫髮無玷
然則公自御史以至中丞勲績懋著豈偶然哉

都察院右副都御史宋公冕墓志銘

唐 胄

公諱冕字孔瞻別號許山始祖嘉祥宋太常博士南渡遂家餘姚曾祖涇祖廷芳祖妣張氏考璿號靜菴妣黃氏以成化乙酉三月癸亥生公性敏異丙午領浙江鄉薦弘治壬戌登進士第凡丑授刑部河南司主事正德戊辰逆瑾竊柄以謝文正公故欲盡傾姚人之仕於京者有一立犯法瑾欲羅以重罪公執如律瑾怒欲謀重陷公固不爲屈後大司寇王公鑑引爲已咎以解之仍捏指降公金谿知縣公至興學抑

強恤隱吏民畏而懷之當道旌有古循良風庚午瑾
誅復授禮部祠祭司主事陟員外郎郎中大宗伯傳
公珪劉公春咸器重之甲戌陞河南左叅議分守大
梁適值歲歉公撫賑有方民多全活長葛縣富民宋
孟雲初抱乞養爲嗣後晚得一子忌之賂吏誣以賊
黨欲寘之死公審錄遂辯其寃丁丑公當奏最百姓
遮道乞雷已卯陞福建左叅政興化有朱姓者倚兄
勢橫行累被奏訴多賄寢公執而諭之一律以法其
人悔悟庚辰永春等處流賊猖獗劫去捕盜通判分
巡不能禦坐失機鎮巡謂滅賊非公不可乃越境借

公行始選精騎百人挑戰誘之出險巢擒其渠長數人賊請以所執通判以易公知賊必驚遁遂料地按伏擒其首從數千送海上者惟百餘人盡推功於失機者以贖罪嘉靖改元公奉表入賀尋陞河南右轄理戎且署臬逾年廉威肅然乙酉陞陝西左轄以織絨楊太監額外之需索過甚欲手疏以聞楊使人陰伺公過以中傷之竟無所得鎮守太監晏宏乃私謂之曰宋公剛正吾屬羞見楊亦自悔邀偕往謝過凡省之應邊糧餉器械無不周備總制荆山王公倚以爲重薦其才行氣量可大用未幾靜菴公與太安人

相繼病卒公居喪盡禮哀毀骨立服闋庚寅北上適
閩有逆變布政查公約輩遇害當道謀所以繼之者
仍補公其省公底定安集之計臺司事久不決者多
屬公平允辛卯大比賓與之典尤極恭慎癸巳陞都
察院右副都御史撫治鄖陽等處地方適 太子誕
生覃恩進階通議大夫追贈祖考考如已秩祖妣贈
妣加贈俱爲淑人蔭一子入監讀書甲午會南京太
廟災具疏自陳不允公念郎三省流聚易於生變凡
謀武興學實罰賦役財用刑獄無不留心乙未偶感
風疾再疏懇乞休致允之公候代會劇賊馬興等起

害連羣昌漢中諸地公疏請勦捕兵進功將就緒迹
代者至遂就道後賊平上念舊勞有白金文綺之
賜公住懜懜族戚黨里無不愛戴未嘗一言欺人入
仕三十餘年清白之操始終不渝嘗訂家訓分列修
身齊家等條皆爲格言每遇節且聖壽必朝服拜祝
過祖考忌辰或時薦其容愴然必敬誠將事暇日聚
昆弟親故勝詠盡歡丁酉秋嬰喘疾卒

都察院右副都御史戴公書傳 胡直

戴書字天錫，景陽人。登弘治壬戌進士，授南京大理寺評事。歷副正，守法奉公，獄稱情，有刑官較駁論奏被繁冗以理勝，暴修大理實錄多所刪正。同事者以文歸之。正德三年戊辰，丁內艱，服闋陞四川僉事。清查各鹽井，竈戶而簡縣爲多，縣中素稱強悍，輒有異謀，按臨計擒之。時大河南北群盜縱橫，流毒西土，復他首惡二人，撫按以聞，特加俸給僉，蜀六載屯政，鹽法利興弊革，民甚便之。遷陝西苑馬寺少卿。十三年，遂有甘肅兵備，副使之命焉。甘肅新遭兵劫，夷情

臣測羈縻者奔竄未定規伺者霧隙未弭於是安集
臣處咸中事宜西人迄今追思之時適逆瑾用事而
兩方正直之操與俗多忤遂以病告歸中途上疏譏
議時事又爲執政中廢目是屏跡村居者八年壬午
嘉靖改元禮科都給事中邢寰奏爲恤遺直舉遺才
以裨化理而首舉書二年 上特旨簡用適西事不
寧遂條陳防邊五策一曰修復重勢以峻邊防二曰
撫存夷酋以固邊疆三曰慎防奸細以清邊鎮四曰
察哈密傾危之因五曰察土魯番繁複之辭皆切中
邊防四年復轉雲南憲副整飭臨安時尋甸劇盜安

銓與其黨鳳朝文鼓衆省城合勢牽制我兵乃引兵
西拔而戰大破之窮其巢穴不閱月首惡就誅有王
舍普顯者役本官普銓縱兵騷擾其所圍結處前夾
峭壁後臨絕巖攻之最難書謀定舉兵向之浹旬而
功成南人以爲神九年擢貴州廉使十一年進廣西
右布政使未幾轉江西左布政使有餘銀數千移文
撫按絲毫無所私同官憾之雖總大藩躬親庶務一
切簿書皆手裁十二年拜右副都御史巡撫貴州比
至以叛苗阿何與土官王仲武節年仇殺拒敵官軍
其醜陳其可誅者八駐劄龍里經畫戎事冒毒霧嬰

疾卒時年六十有九計聞 朝廷特命有司諭祭書
屢任三朝清約如寒士輿論高之

正議大夫資江尹都察院右副都御史省齋陳

公克宅墓志銘

呂本

省齋陳公卒于嘉靖庚子十月二十二日壬寅正月
九日已葬于雲棲鄉陸橋園之陽逾二十年矣墓中
石尚虛至隆慶戊辰其子有勲等乃以少司寇東橋
楊公爲公狀請予銘之予生也晚猶及見公且與有
勲等善也不敢以拙辭按狀公諱克宅字卽卿省齋
其別號也其先宋丞相文正公康伯扈高宗幸越過
姚之馬渚鄉聞鐘磬顧其地樂之命介子祥卜居焉
遂爲餘姚人出馬渚避其父遷于濱村者曰實一公

又四世有諱孟昂者隱居教授以詩名稱吟軒先生
始未嗣育弟子巨理已復生一子吟軒卒妣老且失
明患疽巨理公親吮之且瘞妣呼巨理公行曰巨四
至孝吾所生兒不逮也願天生賢子報汝已而果生
公吟軒以公貴贈通議大夫都察院右副都御史妣
嚴氏繼周氏俱淑人巨理公贈文林郎嘉定縣知縣
加贈中憲大夫四川按察司副使通議大夫都察院
右副都御史妣周氏贈孀人加恭人淑人人皆以爲
天道不爽云公生成化甲午二月二十八日於次爲
六幼穎敏絕人而志尤遠大兀兀墳籍間不治生產

乃翁巨理公以食指繁欲令改業公未敢言固待遊
園中什棋木以悟翁翁曰已成材矣而折之可惜欲
汝舍學實類此自今不汝禁也公乃於書無所不讀
亦無所不記應曆弘治甲子鄉薦明年卒業南雍大
司成楓山章先生問公所志公對曰要於道德中豎
功名耳楓山喜而進之日與談經論學深相得造詣
益精議者以公輔器期之矣正德甲戌舉進士知嘉
定縣嘉定巨邑賦重習奸詭其甚者假荒壤之日移
稅比里民受困而逋負益多公不避寒暑遍履其地
一一而籍之宿弊頓革公又欲輕重歸一則卽神奸

無所售而惡其害已者挾權要尼之竟不行乃更議
金花官布輕齎請一歸重則者民賴以少濟有富僧
其徒之父利其有一日匿其子於外方曳他屍誣僧
殺之公疑不亟訊人或謂公受賕者公不爲動徐
謂之匿者出衆方驚服獮寇湯毛九盤據天目巡撫
張公津奉命征之檄公從一舉而渠魁授首餘黨解
散悉如公筭公治嘉定逾三年威與愛並施而意在
安民如追黠里乾沒官賦不使變鬻闢佛寺以新學
官鑿低圩以通水利差九則以均徭役汰民兵以省
冗食慎訟獄以安良民嚴胥吏以絕苞苴莫不次第

舉之部使交章上薦張巡撫尤稱爲南轅卓異之首
諸所建白輒申布令甲澤及他郡焉戊寅徵拜江西
道監察御史公益感奮知無不言其大者巨闕劉允
取佛馬思臧挾邪益亂疏其十罪乞誅之大禮議興
伏劄上疏諫繼之以號廷杖幾斃號時有亞卿知
上怒欲禍起者公厲聲扼其項曰大臣不當先去爲
人望衆皆凜然大學士蔣公冕尚書喬公宇汪公俊
相繼引去而議禮之臣不次驟進公言進退大臣關
繫國體章三四上甚剴切劾奏武定侯郭勛大不敬
家宰王瓊才而險直聲震天下出理直隸山東鹽法

疏招復貧竈嚴革奏討等七事切中時弊繼按貴州
民苦徭患供億不足公約束有司務爲厚大而區畫
不遺細微行者苦盤江瘴氣裂山鑿道得免毒淫麻
將寨劇賊私有名號屢格官兵公密授計斷事史勅
以署程番篆往因選兵馳襲之賊皆就擒地方底定
內伍外番莫不感戴及事竣還朝道出淮揚民饑公
條上救荒五策且請大發帑儲借留司府官賦以廣
賑濟全活者以萬計乙酉按河南立三場調閱之法
一士必更六主僉同始錄關通弊絕所得多名士共
激揚舉刺尤出至公有憲使某者廖家宰親也居職

無狀公特疏劾罷之廖不能庇部下墨吏皆望風解
綬去矣所至興學校斥淫祠祀夷齊墓葺諸葛丞相
草廬鄆岳武穆祠甄獎賢孝表揚貞節風俗爲之感
化丙戌陞四川按察司副使整飭松潘兵糧公臺資
已逾八年卽內擢爲晚家幸竟以夙憾出置巖地輿
論不厭公曰此獨非王臣耶怡然抵任甫七日會查
臺給舍檄一指揮入南路爲鴛番橫梁寨所殺坐累
戴罪剋賊公拊士卒繕器械凡致勝之具既備且精
乃勒兵夜至鴛寨焚燬房數十所出其不意盡殲之
撫按上功兩荷金幣之賜自是諸番落來犯者輒遭

在躬無不求盟獻馬悔過之不暇矣兵糧多虛冒而
總兵者又陰護之不可詰公廉得其實悉麗詐冒於
罪時何總兵舊在貴州悍公嚴及是何大慚公因而
罵御之頗得其力卒爲名將全蜀比歲大侵民且餓
死不能給邊餉公多方措置又往來督運馳驅道間
藉着爲改人知公之苦心也卽不繼亦無怨譁庚寅
考滿明年辛卯陞河南按察使公素精法律而原情
斷折民自以不究釋趙景陽等之無辜發劉一清等
之有罪皆其表表者不二年薦者凡六上有郭侍郎
按貨亦特疏請補貴轄以從民望時王家宰復起思

中公不得顧對衆稱之癸巳陞湖廣右布政使尋轉
左錢穀出納令輸發者親視其衡藏吏袖手不得與
公刻期遣發吏胥惴惴無敢以事嘗者楚地故稱饒
廣癸巳水甲午又旱困矣又加以內府採辦宗室祿
糧承天建治諸藩濫乞將何以處之公蚤作夜思合
一省息耗而總制於衷應其不得已而弛其可緩民
亦以不擾且提調試事費減三之一而賓興視昔尤
飭初識器什畱爲後舉之用亦省三之一其綜理節
縮率類此公練達精審自信無歉平生未嘗屈法徇
人撫按容有銜之者而竟無一隙可乘顧首薦甲午

冬陞都察院右副都御史巡撫貴州等處兼理軍務
先是有凱口圍賊阻險造逆自宣德以來征之不克
正德間其裔阿向復叛四用兵征之又不克賊轉張
甚巡按御史王杏疏向當誅之罪有八難克之勢有
三命下公相機撫剿公一撫之不得乃按行賊壘獎
督將校乘雪夜令後死士攀崖上以索梯度軍據其
要害一鼓克之問賊校首浮斬六百有奇招撫降者
可二萬計捷聞詔晉公二品俸賞銀三十兩綺二襲
公以曰險絕集衆策擬創穴置守以圖永安適調總
理糧儲巡撫應天等處地方代去漏孽復曳生苗據

國爭之守臣畏譴反嫁禍焉嗾言官論公主用兵非
是公聞而求去甚力得旨回籍聽勘丁酉抵家杜門
養晦危坐一室隨意縱觀經史百家言倦卽出行郊
陌與田父場叟談農圃事歲時謹祀典置遠世墓田
未備者訓率子弟習行孝弟之道悠然有以自樂至
於聲色貨利一毫無所好卽是非通塞悉置不問如
是者四年忽疾作逾日遂不起享年六十有七越二
年壬寅勘貴事者始白公功詔復公職贈通議大夫
賜祭葬并給與祖父母父母父母妻詔贈廕子有年爲國
子生

右副都御史宋公滄傳

郡志

宋滄字伯清鉅野人舉正德戊辰進士授中書舍人
陞刑部員外郎清雪冤枉平反惟公選陞鴻臚少卿
歷陞左通政嘗疏陳時政六事俱中肯綮滄貌偉聲
揚敷奏明敏朝著勳色耀左僉都御史巡撫四川入
境宿神宣驛夜半有數鬼訴冤及至成都乃訪問鬼
所訴者核其情實置之法遠近禱之會白草番蠻劫
掠安綿城堡渝移兵擊滅之復所侵十八寨真州流
賊周天星嘯聚可三萬人官兵不能擒制請於朝發
兵剿平前後蠲書褒賚陞右副都御史世宗每念

滄功且熟於禮嘗曰天下巡撫皆如宋滄朕真無憂
矣一日傳御札擢滄禮部侍郎掌鴻臚事主者奏滄
有功方鎮不宜處以卿寺遂寢已而五奏乞休予告
遂里而卒鄉人慕其忠孝祀之學宮所著有都臺文
稿十卷兼忠定議十卷

通議大夫都察院右副都御史可泉胡公績宗

墓志銘

公諱績宗初字孝思後更世甫秦人也號可泉亦號
烏鼠山人穎悟夙成蚤歲以春秋爲邑學生提學遂
巷楊公虎谷王公咸愛重之中陝西辛酉鄉試繼登
正德戊辰片梅榜進士三甲第一人會有執政子亦
登二甲第一人欲覲翰林清職乃倚中官劉瑾勢以
二甲三甲各第一人因傳臚俱授翰林院檢討仍取
二甲邵銳黃芳等五人三甲李志學等三人俱授庶
吉士實假泉市公也公辭職不獲乃受命與修撰呂

公編脩景公叅對 孝宗實錄成錄賜金幣加俸一
級庚午執政者以理成其子編管爲民乃註公與邵
贊等俱外補公補四川嘉定州判官歷二載陞潼川
州知州俱有惠政乙亥陞南京戶部湖廣司員外郎
已卯陞吏部驗封司郎中以考最得封父如其官母
並妻封贈爲宜人未幾陞安慶府知府時值逆濠兵
後民皆竄去又 武皇駐蹕留都供御繁劇朝議以
公泰人有經略之才特簡公以守刻期履任時夏旱
秋澇公修大政舉荒政上下乂安明年癸未江南大
旱歲饑民流復詔公移守姑蘇公以姑蘇鉅郡財賦

益夥法制益難經理庶務尤詳於治皖會詔守令久
任公任兩郡幾九載久道化成禮讓興行擬古循良
當不多讓陞山東布政司左叅政及去任兩郡士民
皆建祠奉祀樹碑頌德思如父母再移浙藩又改晉
省以平盜功蒙賜金幣辛卯陞本司右布政使壬辰
丁外艱制滿復除河南右布政使時鄆陵盜起公討
平之亦得賜以金幣丙申轉本司左布政使冬陞都
察院右副都御史巡撫山東地方時魯府恣惡公抗
疏以聞得遣廷臣會勘詔奪其祿并革護衛地方藉
以寧謐繼以原職總理河道經畫河防利弊丁酉以

九廟成奉詔進通議大夫得進封贈其祖父母父
母及妻如其官己亥以 呈太子立復奉詔得廢一
子入監讀書既 乘輿南狩公迎於磁乃復改巡撫
河南時 車駕經過公經理周悉事竣復賜金幣汴
中大饑且疫公上疏請賑情詞激切同事者覓而難
焉公曰豈得念吾屬而坐使斃中州數百萬之生靈
哉脫有咎某請任之疏上得發帑銀二十萬兩命大
臣賑貸之汴民少蘇焉己亥冬汴中薄城內外火燎
頻發未幾行臺亦災公引咎乞歸因得賜閒田里爰
築別墅以居日閉閣讀書手未嘗廢卷帙於諸理亂

黜陟不相聞時或乘籃輿課耕隴畝亦或登高賦詩
興盡乃反與邑中薦紳燕會作九逸圖時有巨惡欲
脫罪乃誣公被逮賴聖明洞察寬釋得優游卒老
庚申九月三日方執簡對賓修忽告逝據生成化庚
子享年八十一歲公才氣英發對客揮毫詩賦立就
宛若宿構然雋爽豪逸上追古人凡海內賢達及藝
文之士望形影從聽聲響赴欣欣納交而觥觥詭隨
之徒未免含嫉睨視焉雖大位屢滯不究厥施而功
實詞華流傳遠邇雖百世不泯也有辛巳集丙辰集
各四卷烏鼠山人小集八卷擬漢樂府二卷擬西涯

古樂府家譜各一卷安慶志三十卷秦安志二卷鞏
郡記三十卷秦州志三十卷春秋本義十二卷並彙
選唐雅雍音等篇皆已行於世其河嵩歸田諸集未
梓者尚多

都察院右副都御史瓶山胡公宗明墓志銘

張時徹

語曰豫章千霄匠石羣睨華衣入市行旅共指古今
所稱豪賢人何弗然乎瓶山胡公益宣朗強毅人也
長材偉略雄視海內彼其亢節勵行盡率宜猷期以
明在三之義而揚見龍之光顧豈有飾智矜奇越俎
伐割僥倖於不可必得者哉而乃橫被訕錄卒之顛
踣以沒此其毀譽愛憎之故難言哉難言哉初公之
少也試藝於監司輒盡誠其諸生長者未幾策名計
偕舉進士高第注民部郎獨邊監兌暨督餉者數矣

凡皆周節廣志者所不屑爲而公則獨勵操尚嚴簡
書皎皎者聲績已乃歷四川叅議改廣東進潮廣副
使適漕河梗塞督治大有功都御史劉公天和簡公
霄交疏其績已乃轉福建叅政下車首問民所疾苦
而浮糧爲甚益閭故多山澤之稅地利率遷徙不常
而通番者滋益衆官司無何率委其征於寔斂而衆
右坐業其利民用大困公乃盡括見產而則之賦且
均其不根無歸者積困頓蘇而大不利於衆右始籍
籍多口矣會公遷長蜀衆以去而御史按閩者妄庸
人也素不懽於公入衆右言遂疏公治閩無狀宜罷

會相臣雅才公下吏部疏其治行卒不得罷而衆不
洞隱曲謂公結於柄臣咸思有以傾之矣已乃調廣
西佐都御史毛公伯溫平黎有功進雲南右使河南
左使又以憂免起山東左使陞都察院右副都御史
巡撫遼東言官恥其黨不勝也復申前論而相臣鎮
右之落言官職衆益譁不平而禍機自此牢矣遼固
東北要邊虜入無常時公至則明賞罰申禁令集謀
謨精技擊增築屯堡據險守要北虜至則堅壁清野
精騎突其前伏兵犄其後左右夾擊虜大崩潰擒斬
數百人獲輜重無算捷聞朝廷方議下爵賞而公以

爲積靡之餘不一大創虜終不遁匿乃師李牧故事
委縱人畜誘其深入而盡殪之而言官不察疏爲失
事遂譴浙江參議此非惟不悟兵機亦伺瑕媒孽者
之過也已復俸其速仆而詆斥益力竟削籍以歸公
仰天歎曰嗟乎鴻鵠而與雞鶩爭食駃騠而與騊駼
抗轅豈其志之所安哉顧低回隱忍不敢遽自引決
誠以國恩莫報而馳驅之志未衰耳夫改錯而追曲
者項夫之恆也執方而違衆者達士之操也而今而
後庶幾得從吾好矣乃陟降原隰擇山水便利處樹
稻藝園稼家衆力作時植杖逍遙歌十畝之章以自

適適如也歲時伏臘則烹豚醢酒集里中厚善者觴
詠爲娛益不知日月之千邁也人有言鈞曲者受隆
赫之寵懷璧者蒙屢削之悲古今大抵然矣公負益
世之略持不絕之操卽不能鳳舉鵬騫依日月之
際豈不可以積資累秩遨遊於坦途者哉至其以才
推較於相臣要亦雅所信嚮非世之躡影希炎者也
而尤詬繁興卒成市虎之禍謂世有明公之志者否
耶公名宗明字汝誠別號瓶山

通議大夫都察院右副都御史張公文魁墓心

銘

韓邦奇

公姓張氏諱文魁字元甫別號字川河南開封府蘭陽縣人也其先本山東單縣人勝國之季高祖長公者避兵蘭陽因家焉曾祖宗信贈通議大夫都察院右副都御史父讓遞運所大使封承德郎刑部主事贈奉政大夫按察司僉事加贈通議大夫都察院右副都御史配畢氏封安人贈宜人加贈淑人初弘治辛亥公方垂髫河決城舉家舟而覆恍有朱衣人掖公泊於林杪以免弱冠補縣學生正德丁卯鄉試中

式戊辰登進士授刑部陝西司主事時權瑾流毒緡紳衆爭以苛刻冀自免公獨多平反人皆危之弗恤也旣而連丁內外艱服闋赴部冢宰曰是權瑾時執平主事耶陞刑部山東司員外郎平反如主事時陞山西按察司僉事巡冀北道初大同當權幸隨駕經過之後地方官緣爲姦利至是巡按張侍御英檄公勘之公按都指揮章傑宋文尅削軍資十四萬禡其職竄巨猾陳萬尚寧於炎荒旣而督修沿邊險隘身往臨巡嘗遇伏虜於橋頭堡公以護兵直前迫之皆遁去胡中丞錠薦公才賜帑金十兩陞布政司左叅

議復守冀北首疏宗室聰淵長史趙寬太監王哲總
兵楊玉數十家之橫罪其黨二百八十餘人權勢叙
跡數追豪商蘇需通稅八萬餘金皇店李瑪遭課十
萬餘金克軍儲又閉大同關王廟以釐請罪之俗毀
藩府聖母祠以絕結緣之妖楊中丞志學俞侍御集
皆謂公宜民之仁足餉之才擊強之威可方古人云
陞陝西行太僕寺少卿大同副總兵雅重公以鞍馬
金器馳賀於陝公曰吾不以易地易介也卻之陞苑
馬寺卿裁革豪強私買私賣之弊馬政以清勅有廉
靖不苟淵塞有猷之獎陞山西布政司右布政使尋

轉山東左使革堂食裁冗費羨餘月計千餘金別貯以資海道備倭之用楊太史維聰謂公直諒之心剛方之氣清苦之操淹貫之學經綸之略實有人所不可及者云適寧夏撫臣告缺廷議以公久歷關陝大同陞都察院右副都御史建節朔方虜三入公指畫方略捕斬四百餘名穎捷聞凡三拜白金文綺銀牌之賜陞俸正二品唐吏侍龍謂公秉度策勲儼然爲疆場之鎮夏人管黃門律亦曰夏州撫臣剛折而柔廢惟公不茹不吐得撫臣體云嘉靖戊戌春虜困夏遊擊於宴官湖公得報自率大衆援之虜始遁因襲

寒感疾力求解任不允會大慶推恩封通議大夫謫
有鎮危立利比於南仲之詞乃有不悅公者罷公節
鉞俾叅知行省政事公力辭以都御史致仕云既歸
杜門謝客鳴琴賦詩時召親故子弟能文者考德問
業終日不倦偶晨興曰何錦衣甲馬者克斥吾庭仰
居數日乃卒云公生成化己亥九月卒嘉靖二十一
年七月年六十有四訃聞特遣賜祭葬公聰察沉毅
剛直果斷內行修謹雖隆夏未嘗保體晏坐盛怒未
嘗撫案大叱嚴於嫉惡見吏之貪汚者如仇獰然服
善休休若已有之陸太史欽謂公氣清而貌癯身若

不勝衣而剛中有制至臨大事決大疑確不可移云

通議大夫大理寺卿前巡撫江西都察院右副

都御史浦南胡公岳墓志銘 徐階

我皇上受命中興羣賢景附于時有宜力任事之
臣曰華亭浦南胡公諱岳字仲申起家刑部主事歷
員外郎四川按察僉事湖廣副使廣西右叅政福建
按察使江西廣西右布政使江西左布政使擢都察
院右副都御史巡撫江西改大理卿未上卒公爲人
以氣節勲業自許事至能立斷爲刑部時虜囚鳳陽
大姓甲與乙爭田鬪不勝因殺叔誣之一具憚莫敢
決至公乃決上之卽位憇選藩臬大吏與圖化理

以公爲才遷四川芒部寇川南公當分巡會病議更
川西齎曰人固有死必川南邪卽督兵入其山斬未
通道二百里募死士塞賊走路大合兵搗之誅若干
降若干人捷聞賜白金文綺松潘兵備副使遷當路
者曰是重地且其政廢久共胡某不可檄公公往覈
戎籍實倉庾厲侵剋之罰卒以月餉質富室計其息
以十三爲取券焚之居數月米餘於廩人餘於力繕
甲仗營堡開築事改於舊諸夷營馬總憲于閩數據
法直民死罪按賊吏不以御史意假貸語時議御史
御史至而發赤流汗乃止閩故贖得事之未報者最

夕下郡縣盡閩之屬檄日常八九至吏傳寫不能給而公聽讞乃恒有暇手校四書五經及晦菴先生集翻梓以傳江西吏巧文而輕犯法爲置簿書勾稽以時遠視廣聽姦至卽發問以禮規御史御史怒公不爲撓曰吾務盡其在我者治事如初至疾病猶扶掖以出御史竟不能有加後至者以績聞拜中丞公益自奮首爲書數千言徧以授羣吏已乃汰冗費更役法民視產出錢歲不過十一役於官有常期榜懸籍刻吏無得動郊廟建詔市材楚蜀吏盜官錢更賦民或張旗幟擊鼓伐金從徒百餘行視民所植出黃紙

封之縛其主怖曰當自輸京師民號泣致厚賄乃免
公嚴爲禁楚人賴安歲饑手疏以請上爲減所輸
全活甚衆公旣勤於政疾復作迨被徵已艱於行會
聞繼母喪自江西歸其家踰月遂卒公平生於財廉
所至未嘗市民一物其與人處言笑歡謔洞然不疑
然或以不義櫻之輒詬怒已又輒霽嘗面折人之過
聞者震懼不能勝及論薦人才終不沒其善交游姻
故雖在寒賤拯援周卹必盡其情然不可干以私故
賢者服其誼不肖者忘其怨宜力任事初若不容於
俗而卒成其名致位通顯蓋非獨所遭際爲然公生

成化甲午卒于嘉靖己亥享年六十有六公昔領正
德庚午鄉薦於階先叔父爲同年甲戌舉進士於階
爲先輩其後階自翰林出爲延平推官於公爲屬自
浙江爲江西提學副使於公爲僚公遷中丞又爲屬
幸獎識焉乃泣而爲銘

焦太史編輯國朝獻徵錄卷之六十一終